



ル 5
3134
16



門 儿 5
號 3134
卷 16

南潯志卷五十八

里人周慶雲纂

志餘九

曉寒樓雜憶潯上以書畫名者代不乏人琴自家治夫先生外無聞焉至弈則尤絕無僅有非弈之鮮於書畫也蓋弈必造其極始足以成名非如書畫之可以假借也然如予所見邵丈者亦庶乎近焉丈諱口字典綸與弟某字懷芳皆縣學生並善弈而丈尤勝其去國手不過二子遠近無與為敵同時唯姚某行十人呼與齊名然門第人品遠不如丈矣又博洽多聞嘗見其與人弈酒後或與言史鑑亦娓娓可聽晚益頽唐然終不屑干人遂侘傺以終

又家秋墀諱南星字壽門亦善弈與邵丈相去不遠我家故多能弈唯秋墀著名於時

又家味閒駒子族兄也善畫斷簡殘編極工細嘗爲人寫扇頭人爭寶之亦工書兼篆刻人家有素事章聯半出其手兩耳重聽人故以聾呼之又善藝菊瓦盆纍纍不下數十百種每當花時璀璨溢日滿圃皆馨獨攜壺酒酌花下怡然自得頗有柴桑風致人有乞者亦間與之求諸晚近殆罕其儔

又家萼園邦直能書頗得董華亭筆意與先君子及治夫兄最莫逆嘗館洞庭東山求書者踵相接也予至東山時曾於翠峯佛寺見其遺墨今不可得矣

又家西庚七襄能左書自少嗜酒中年得手振疾右手遂廢因改用左無論大小皆以左代卽場中謄試卷亦用左書較之右書反覺工整風雨樓庭前植翠竹數竿高出粉牆又有梅花兩株當門左右交柯連影客入門者必俯首而過西庚爲予書門聯二句隔牆但見修竹入門先揖梅花實一時真景也今西庚之書旣不可得而竹與梅花亦俱槁死俯仰陳迹其何以堪

又予自少從魯堂先生游故於星槎家及見其四世其門內之雍雍和順固有非他家之所能及者魯堂先生配嚴孺人以下旣皆恭儉慈惠克盡婦職至西庚妻嚴氏自少知書內和外嚴統理家政二十餘年一切婚喪皆經其手豐儉適中人無閒言尤所罕見及乎臨難又能慷慨激烈一死以殉斯亦女中之烈丈夫哉援筆以書敬悚交至

又溫君子彝諱金萼又號花卿府學生愈愚先生高弟也為人

翩翩儒雅子自曼仙卒後常寓其家甲申時閔君一瀛館金氏

載德與子彝居相去止數武晨夕過從每風月佳時相與坐含

暉樓上流連光景暢談今古亦致足樂丁亥結詠霓文社於御

書閣子彝爲政首集會者凡七人爲陸虛若丙董硯洲邦楨閱

一瀛希濂吳嘯山□□家眉峰兆銜及子自後遞有增減不止七人點定者

馮箕園先生也性嗜酒予寓其家時子彝尊人尚在每夕侍飲

父子相對歡然自得也家故貧父歿益甚遂出游山左後并挈

其家以去予嘗賦懷人詩諷其歸子彝不能從今聞其卒已數

年矣檢閱舊章悽然於懷

又錢君穎蘭師泉高弟也師泉嘗館其家故亦能文師泉卒貧

無以葬穎蘭獨助數十金許丈海樵更醵金同人並舉師泉三

世葬於馬要子與許丈父子及丁君子香親臨其穴時道光乙

未冬也穎蘭後以廩貢任湖北武昌知縣

又家秋瀾先生諱榮炳原諱元章字邦泉烏程學生元圃先生

第四子磊再從父也嘗著不盡無稽四卷於鄉邦文獻頗多纂

述惜庚申之秋焜於火今無存矣磊惟憶其中有紀其祖豫石

先生還銀事今撮其略於左王父豫石先生諱望字斗南縣學

生一日晨起見楊僕攜有碎銀數兩詰其從來云拾自陶家街

先生曰此必人家遺失設有意外之變汝罪大矣若以原銀還

之我厚汝值必償汝銀否則我且尋失者還銀汝請從此辭矣

楊僕素義先生卽往原處正有夫妻勃谿者問之以失銀故蓋

南漳志 卷五十八 志餘九

婦早起撲被窗外遺其銀疑夫以賭博竊去楊僕爲言主人意以原銀還之夫妻大喜後先府君於乾隆庚午舉於鄉此婦尙存特來叩賀以爲王父陰德之報云磊按還銀細事未必卽因果也然有一事與此正相反附錄於此以爲學者鑒棲莊邢子容諱默歸安廩生有文名一日赴秋試在省寓有人來訪問誰是邢先生左右以對其人曰先生今年秋元也某元夕夢天榜今年浙江解元湖州歸安邢默邢大喜後偶游西湖於斷橋邊拾遺銀十餘兩未幾有老婦來尋人有指邢拾者邢堅不與曰此正我今年秋元之兆也老父哭而去至遺銀處望湖欲投有憐之者乃代償其銀及榜發邢被黜解元卽代償銀者也或云償銀者卽前夢天榜之人一念之差遂至淪落惜哉

施祖望風月閒談余弱冠時讀書溇北費氏費有族姪某偶至溪邊瞥見半尺許小人隨波蕩漾肉色腴理如鮮蝦而臆輒因撈置岸側審視之兩目若瞑左手掩臍臍下具男子形僵卧不動似死似生一市聚觀莫測何物時初夏溪流驟漲羣疑爲水怪仍投溪中順流北去或謂此婦人所產怪胎棄諸水者說似近理然方書謂胎必三月成形五月分支今軀幹未及五月之胎而五官四體眉髮畢具又何說歟

又里人邢在東偶經通判署前見裹物在路拾視則珠璣滿襖默數其齒坐階石以待之至薄暮有老嫗踉蹌來垂涕尋覓詢其故嫗以失珠對計其數與所拾相符卽還之嫗展拜問姓氏不顧而去是夜在東睡至三鼓忽若有人推醒張目而視則竈

前失火延及寢室烈燄方熾急起撲之應手卽滅若有神助人咸謂積善之報

又菜花兜郭某在粉資肆中傭磨爲生家有孀母一妻一子一女一恆終日不舉火而融融洩洩家室和平郭每丙夜歸家作食進母必徧引近日新聞以資談助爲母解頤近鄰有夜深未睡者皆聞郭母每飯必大歡樂也郭之妻里閨罕見其面偶或邂逅衣裳楚楚容止端莊見者咸肅然起敬傳云培塿無松柏吾斯之未能信

潯溪棹歌注鎮上舊猛將會極盛童時猶及見之嘉慶丙辰以後民物殷阜遠非昔比年來凋瘵尤甚所謂市戶田者官銀漕米船隻耗費而外租稅無幾矣可慨也

墨溪賸墨道光十八年六月予家藕河坊舊宅廳事中地下忽湧火輪大如栲栳穿樓越牆而出時日正午天氣晴朗家人團坐絕不聞雷聲牆外行人則迅雷不及掩耳所穿處簾幙張挂儼然微撥之盡成灰燼矣

潯溪棹歌注吾鎮無山惟藕河坊後有煤山原係油車堆煤之所年久雨漬積成培塿高出重簷數百年於茲矣嘉慶末年鎮人桂某宅北坐煤山復租蔣宏號醬坊其後門東通煤山欲於兩後門作一徑道因將煤山西南隅開墾見有數十骨瓶半已掘毀其中有大者數枚囑長生會中帶至妙喜杼山義塚埋葬訖越數載桂病延羽士沈春暉祈禱因至山前祝送未幾沈亦病病中被陰司攝去詢知桂被元末張士誠將霍師古告發以

其毀棄骸骨援沈作證值鄴都事冗未訊而蘇後十數日復被攝審竭力營救師古已可消釋而其弟骨瓶敲破拋棄執定不允沈甦而桂遂死于是小徑亦不復開俗傳山下多元末盜骨於此徵之猶信

梁恭辰勸戒三錄顧小韓方伯

學潮

言楊乘時

溥

無錫諸生年

過五十閨中但有五女因娶妾焉娶之日賓客讌賀者未散主人入房見新姬嗚咽鏡篋次慰之不止詰其由乃曰憶兒家阿父爲南溟通判時嘗置多妾後爲阿母不容鞭箠極楚逐出後甚有流爲娼者阿父聞而不忍使蒼頭持金嫁爲廝養婦或送空門今不幸父兄俱戍黔疆母妹早年喪失子身異路遭媒儻居奇侍巾櫛于君子撫今追昔不覺悲從中來楊爲之泫然曰

毋泣我之祧嗣有命存焉何忍以宦家女爲媵妾爾其爲我女當爲擇一佳婿女再拜遂命與諸女寢隸姊妹行出謂客曰君輩且留不意今夜復得一女請再作湯餅會具述前事眾客頌盛德明年夫人舉一子臨蓐時公坐堂上驀見二隸導一官進方欲迎迓官遽趨內室與二隸俱不見覘其面貌女謂酷似其父也公年九十餘終子爲名孝廉諸婿俱顯貴義女婿後亦得官貶贈公爲中憲大夫焉

藝圃雜記趙開成無賴子也有斷袖之癖有唐二者亦爲所誘趙因開一布店囑唐經理焉唐少孤頗善事母自與趙結交後日事賭博母至衣食不給亦弗顧一日唐病歸家趙往問焉甫至唐門趙忽仆地大言曰趙開成你來得恰好予止此一子被

汝引入下流今日要你命矣一時觀者甚眾與趙熟識者扶趙歸狂號數聲而死次日唐亦亡

王引之國語正義序歸安董文學增齡博雅士也所著國語正義援據該備自先儒傳注及近世通人之說無弗徵引又於發明韋注之中時加是正可謂語之詳而擇之精矣曷余爲經義述聞一書謹志家公之說附以鄙見其中亦有攷證國語者他日寫定當以就正於董君

俞鴻漸印雪軒隨筆南溟鄉間有一小兒摸蚌溪中忽得一瓦其色黝黑叩之有聲以爲銅也攜之歸閱數日以布拭之微露黃色異而告其父其父攜至質庫中求人識別之質庫中一人見驚曰此金瓦也何爲乎來哉鄉人告以故乃欣欣然懷之去

權之得八十兩有奇

于克襄鐵槎山房見聞錄道光癸卯閏七月有焦姓在吳梅梁侍郎宅內設帳夜間夢至一處屋甚寬廠見王定九相國居中而坐焦詢之旁人云現在京城隍也頃有書吏入報某處出一土地缺定九相國云可命溫文禾補此缺隨喚溫告之溫自言母老家貧求老師寬限相國命判官查其算據云十八年方可到任焦豁然寤尙不識溫爲何許人後始知係工部主事乃相國門人也有人向溫述其夢溫言十八年後死爲土地亦復何恨閱十八日而溫殂蓋焦於夢中誤記耳

鄭光祖一斑錄雜述三年前聞有江湖男婦數十人假逃荒名來游各鄉鎮婦女當前直入人家內室攫零殘食物及茗盃餘

漚入口雖銀錢箱櫃封鎖並能攝取伊等夜來聚居寺廟空屋
覘其賭博甚豪大酒肥肉以為食豈因荒流徙之民哉上年癸
卯又聞嘉湖兩屬亦受此擾南潯為巨鎮店口居民遭攝取者
已多有鋪戶某不信力為辨証然人言籍籍姑回自檢則帳臺
十六番無有矣

太湖備攷菱草出東山南湖自菱田以西遶至長圻彌望皆是
夏秋刈之南潯震澤諸油坊買以飼牛舟載不絕

潯輯古濠走馬垂虹落照一作垂虹夕照范莊蓮沼西村漁火一作西莊漁火

通津霽雪荻塘帆影石解菱歌一作曲江菱歌禪院鐘聲一作古寺

鐘聲此俗傳南潯八景不知始于何時後增東閣臨流南樓春曉
為十景潯溪文獻載沈大聲詠十景七言絕句及沈國正次韻

各十首乃康熙時人董志載茅映奎方能詩各十首竝次大聲
韻乃乾隆中人其後復刪去通津霽雪東閣臨流南樓春曉三
景易以洗粉花香煤山望月嘉應香市仍為十景則當出嘉慶
間人所為也范志云明余山人津著有南林八詠詩稟董潯陽
份始增二景董遐周斯張復易三景沈大聲詠七絕十首朱國
禎和韻今攷余山人但有潯溪漁唱二首竝無南林八詠漁唱
中亦無八景之目董潯陽泌園集中無八景十景詩且南樓即
董紹聞園中之百尺樓乃順治中莊氏所建明時未有此樓安
得預設為一景哉董遐周靜齋詩文及生平著述未有一字
涉及十景者范氏附會臆說殊不足信又誤以沈國正為朱國
禎則是康熙時人作詩而明人和之也不益可笑乎

春在堂雜文續編兩浙鹽運使高君諱卿培字滋園安徽貴池人也中道光二十三年入貲以縣尉發浙江試用卽奉檄攝南潯巡檢旋補西水驛丞

沈曰霖晉人塵南潯近村有陶升九者業醫年至七十餘而沒生平足跡不出十里外南未至烏程北未至吳江勿問其他矣嘗向人問其城郭之狀

黃丕烈百宋一廬書錄愧鄉錄余有兩本一得於杭州一得於郡城皆宋刻而各有鈔補郡城本南潯友人易去所留者乃杭州本也宋刻缺八九十一卷并補鈔散闕者核之共七十五葉空白十葉就其行款相對所補必非無据所空亦屬缺疑知不足齋所刻當卽据此本目錄卷九中金年號金字係屬後人

改補鮑刻仍之郡城本猶未改也此本有楊氏夢羽印吾郡故物仍歸故土書之精靈亦有聚而不散者耶

丁丙善本書室藏書志劉疏雨諱桐字舜揮烏程人銳志聚書築眠琴山館以藏之屬奚鐵生寫訪書圖以寄意

西芬艸堂主人新聊齋志異南潯下鄉觀音庵中一北直人來就庵髡首隨一子甚木訥言禍福輒中授之兩竹削舞時潑水不入詰之曰避兵來斯曠是舞削非劍術耶旣木訥又肯言禍福耶彼人者叵測之矣

陸以湑冷廬雜識烏程孫愈愚明經夔刻苦於學耽吟詠尤工爲古文辭嘗與震澤張淵甫學博履書曰文章之道一真氣所彌綸自時文興而士安於剽竊摹擬之習去而習古文亦同此

伎倆安得不僞究之天下惟真者為能感人於無窮而僞者祇可欺一時之目自古文章傳真而不傳僞故讀書不必多而要
在通其意抒辭不必麗而要在達其心云云又嘗選歐陽永叔
蘇老泉東坡曾子固劉原父李太伯之文各數十篇早夕諷誦
而不取王介甫惡其辯言亂政也

又乙未秋余在都中與葉素庵孝廉歸安溫稼生工部同年文
禾席間以經書成語合四聲者行令共得二十餘句附錄于後
坤厚載物天五地六於女信宿維此二國童子佩鞮蒲與二屈
吾子好直將以眾逆其子幼弱齊與晉越商紂暴虐公子棄疾
何以冀國昭子退曰劉子摯卒曾子怒曰曾子問曰征鳥厲疾
毛者孕鬻三老在學觴酒豆肉

朱琰金粟逸人逸事震澤吳明經晚青山秀嘗謂逸人曰君為
瓜田徵君入室弟子田中有瓜而君樊圃之可為師門扞衛矣
逸人曰瓜田師錄某為弟子年最晚諺所謂抱蔓瓜也明經曰
抱蔓而過梢頭結大聞者捧腹

葉名禮橋西雜記烏程施北研國祁熟於金源掌故所著金源
劄記外有元遺山詩注十四卷詳於時事而略於故實自言舊
稿焜於火友人懇懇更聚書注解七月而成宜其疎漏也卷首
列年譜一卷考遺山年譜大興翁覃溪學士方綱歛凌仲子教
授廷堪皆有成書詳略互見合北研而三矣元人閻宏曾有遺
山詩注本後聞姚木庵之言而止見姚文公燧牧庵集閻君墓誌銘其時相去
未久引據時事當必信而有徵惜其書之不成也

李氏宗譜蓮塘公歲闌家居一老嫗偃僕入後隨一攜卧具者公問之若弗聞詢攜卧具者知嫗爲增產價而來公憐嫗龍鍾甚謂嫗曰吾知爾歲闌不免拮据予爾米若干錢若干可卒歲乎嫗聞乃言曰米如命錢請倍之公曰諾給如數屬原舟送歸越一日聞嫗以暴疾卒人咸爲公幸焉

金華客窗筆談周寅亮妻沈氏南潯人家貧寅亮賈於外子昌福八歲寅亮歿沈下撫遺孤上事尊嫜專賴十指拮据湖俗信鬼神婦女多入廟燒香沈獨不爲所惑嘗曰以嘉言懿行爲子孫講解可以身體力行因果之說未足憑也人服其識見之超玉冊道人珊海餘詠南潯某無恆業一日見少年以絲賣牙行得番錢三十餘枚潛步其後日晡至荒僻處抽鐵尺擊其腦後

應手倒腦漿迸出而死以所有藏諸懷道旁檢巨石以袴帶縛屍四顧無人推而沈之河渡口有小土地祠神像生動某戲之曰此事惟爾知我知祕之當以牲獻恍惚間聞空中小語曰我是不說只怕爾自說索之已杳心竊異之抵家收檢行囊計權子母數年僅得温飽亦無大利適過烏鎮茶肆中見王姓與之談大悅約與合夥貿易一路順境於是娶妻成家數年兒女繞膝又數年置田產起房屋煥然一新家道富有矣一日與王煮酒談心顧盼自得曰僕始願不及此蒙君攜帶得以自給光景荏苒轉瞬間皤然老矣王曰吾輩終歲勤動原圖什一之利區區者分所宜然亦何足數某曰君所謂易者有恆產也若僕者赤手成家不亦苦乎王曰與君合夥時並非赤手某曰十數年

交好無不可言況事隔久遠料無他變然追思往事未免歉懷王詢之以謀害事告述其顛末王沈思良久笑曰英雄崛起草昧半由亡命子何嫌焉先是王有長子未弱冠命買絲於市不知去嚮今聞某所謀害者衣服狀貌怪其符合歸謂其妻曰曩者吾子走失無蹤今有端倪矣妻曰事隔二十餘年茫無證據若以彼醉後之言造次控告他日反爲所噬君其危矣唯祝我兒九原有靈屍首未腐命善泗者探之得有實據冤可雪也王如言聘善泗者周姓囑曰我前在蘇州買一翡翠用布帶拴縛不意中途失手子爲我取之百金不吝也周入水頃之出曰石甚巨布帶儼然未識是否囑再探之出而恚曰石係拴於屍身子必有不端事連累我我不受汝賺也扭而鳴官王隨至縣門某亦昂首來卽邀爲證某不知所之甫入署大聲呼冤指某謀害其子卽以前夕所言爲據某曰冤哉僕酒後戲言耳子以爲實耶令命役以大船二跨於中流上立架用轉關以鐵鈎繫之盤旋出水其屍面目未變王撫屍大慟鄰里老者識之皆曰王某子也某語塞不能狡辯遂置於法追其贓

瓶庵筆記明魏叔子著賣酒者傳曰吾聞賣酒者好博無事則與其三子終日博喧爭無復家人禮或問之曰兒輩嬉戲耳否則博他人家吾產敗矣冰叔稱之爲智士近時南潯某翁家貲鉅萬慮其子他日不克守成十一二歲時卽攜之入妓院出手與偕並廣聘博場名手教以種種手術方法以冀日後出而酬應不致爲人所愚又滬上金珠錢當各業店規極嚴客至必挂

號無事不准外出而夜間休業則團聚作雀戲雖當手與學徒亦並坐接席無忌利不外溢以免虧空逃避之舉其均得賣酒者之遺風歟

張廷貴記叔曾祖芝山公冤獄余叔曾祖芝山公諱滋三儒而賈者也咸豐八年設布肆於清風橋側與郡人吳某交易吳託市貨爲名沒其金千訟諸官而吳仗伊戚楊爲援楊故官漢陽有貲財聲勢赫奕郡中大豪也爲之把持公竟不得直憤甚控之省楊致函撫幕又爲所抑冤苦鬱結幾不欲生不得已徒步走京師爲急奏陳楊不法事十並及時政之乖投都察院衙門時粵寇方熾朝廷開言路都御史不敢隱匿竟以上聞得旨湖州布衣張某狂惑昏迷妄談國政著原衙門押解回籍公自是殆矣沿途被驅如羊豕索賄不予因而推辱之比至湖邑令馮提訊訖仍繫獄而楊陰賄獄吏使斃之賴馮令審其爲人庇護獲免尋釋歸然在獄百日溼穢熏蒸潰瘡遍體手足癱瘓遂成廢人未幾卒

九九消夏錄鎮之名蓋古鎮將之遺宋初廢鎮將而存巡檢寨鎮之名因而不改吾浙海鹽縣有澉水水經所謂澉浦者是也唐開元五年張廷珪奏置鎮宋紹定三年監澉浦鎮稅羅叔韶使邑人常棠爲澉水志八卷一鎮有志自此始也全書八卷分十五門止四十有四葉蓋以簡而見長者也明人武功朝邑兩志實出於此然近時烏程汪日楨作南潯鎮志多至四十卷嘗與余言省志備載一省之事不可太繁若府志宜詳於省志縣

志宜詳於府志鎮志宜更詳於縣志務在博采廣收不遺鉅細以備將來修省志府志者之取裁是說也亦或一道乎

管廷芬花近樓叢書序跋記罪言二篇烏程溫睿臨晒園著六葉跋云罪言

者實所以罪河臣也然至今日凡軍政河漕諸大政可以持權而侵國帑者罔弗喪心爲之又遑顧天下之清議黎庶之顛溺哉則河臣之罪似可稍減矣

又出塞圖畫山川記附八旗兵志合一卷烏程溫睿臨晒園著跋云此篇

蓋康熙間敕修皇輿圖表此書不載四庫全書時出使繪圖之事知聖武

所戢雖外藩莫不虔恭故周覽萬里各有鄉導不至失道於沙漠殊方異俗載筆而書可謂壯遊之極矣至附八旗兵制本朝龍興長白訓士練卒辟土啟疆所至無不臣服故嚴城各設旗

兵駐防永無外患之侵今春寇陷杭城巡撫等官紛紛殉節賴旗兵奮勇固守以至寇不能支而遁足見開創良謨雖歷世尙守其法度也

又讀魏書地形志隨筆一卷烏程溫日跋云案是書原名校異

其七十餘條張丈秋水插架有之此卷僅存其半係刪節之本然寇患以來茗中典籍淪散如遇原書當重錄之

李遇孫金石學錄張鑑居湖州南潯鎮精於考古爲劉阮二宮保師所深器嘗有墨妙亭碑目考及古甃記等書其碑目考自序略云孫公墨妙亭石刻迄今七百載而石與拓本存者絕少余以聞見所及疏而出之有鄭氏蒞睦所未知者然亦十纔得其六七耳異日苟有能發府治之沮洳而復樹之則斯錄之逸

者存闕者補邑之幸非卽此書之幸歟

李氏宗譜琴若公與閔一煙先生善閔自言知其中事謂公曰君族有設彙年煙鋪者字紙積滿坑廁當受冥罰後將不昌公屬彙年易包字紙爲花記不二十年後嗣零落殆盡矣

又峙羣雅深二公難後藉舌耕餬口太夫人極嚴肅客至隔簾以覘其舉止聆其言論供一飯必豐其饌或語涉不經則扶杖出面責之時霍雨客議積米以待賈太夫人隔簾語曰年荒米貴比戶啼飢君卽獲厚利於心安乎客嘿然逡巡去以故輕薄浮躁之徒無敢至者

郭容光藝林悼友錄初集董熊號曉庵湖州人居南潯善篆刻爲人誠謹所至不善承迎故常孤寂于旅館余喜其真率無趨炎之態每爲知己所作必精心摹仿唯嫌過守規矩致少生趣咸豐辛酉重晤於滬城廡樓已抱痼疾猶爲予治印未幾而卒爲曉庵知己者無不爲之垂淚焉

齊學裘見聞隨筆南潯張秀才思訓號笏山壬戌夏聞長毛將至先載笥篋往鄉覓宅作遷避計留其婦在家居守一日有一賊首至其家一犬聞聲從內奔出直撲賊身齧其面時賊手無器械從者皆出掠無人在不得已釋婦禦犬犬終哮撲齧不放婦乃得間避出後戶適遇其夫掉舟來逐遂登舟行未里許此犬亦奔至躍入舟後聞此賊因受犬傷而斃未數日此犬亦死蓋與賊鬪久已力竭也葉調生口述

冷廬雜識國朝志書如平湖陸清獻公隴其靈壽志不登寺院

黜異端也不載坊表尙闇修也不及前人文字之彰著者如樂毅報燕王書之類欲人博求之典籍也體例最嚴會稽章實齋學誠作永清志敘例有云近人輯志藝文不載書目濫入詩文雜體因力爲釐正別具文獻其識亦卓近時烏程紀石齋磊震澤沈退甫眉壽作震澤鎮志以列女載流寓釋道之前亦足矯流俗之弊

又咸豐乙卯年吾里皇甫湘山上舍岷患牙齦腫爛兩股青脹其勢甚劇諸醫不效烏程溫醉白診之謂病名青股牙疳不必服藥惟食馬乳可愈如其言一月全愈又一戴姓婦人病證相同亦食馬乳得痊按此證見於御纂醫宗金鑑八十四卷外科門長洲唐笠山大烈所著醫宜博覽論曾述及之吾鄉罕有此

證醫家知此者亦鮮矣

春在堂文續編咸豐之季杭州再陷寺按卽昭慶寺爲焦土收復之

後有羽高律師者誅茅爲屋聊蔽風雨江蘇信士張月葭捐貲重建法乳堂五楹餘未逮也光緒四年今住持律師發朗慨發宏願冀還舊觀監院僧蓮舟助之經營於是善信景從檀施雲集凡六和堂綠野堂蓮喻室祖師殿伽藍殿齋堂客堂庫樓寮房次第告成而戒壇猶有待也爰有錢塘丁君松生與吳興龐君萊臣張君定甫過而歎曰昭慶以戒律聞天下而傳戒無壇非獨佛門之不光抑亦杭郡之羞也乃出巨貲重建戒壇又以餘力建法壽堂贖還放生池而寺之舊觀盡復都凡用洋錢八萬有奇而戒壇所費居四之一戒壇旣建仍依故事春冬傳戒

僧俗畢集信受奉行而昭慶律宗於是乎又復振

墨溪賸墨溥人吳子才夏登吳山遇雨持傘而行忽龍陣風起被攝越江至西興墜下偏體滑膩如脂渡江歸有羽士見其衣曰此龍涎也以十金易去

春在堂文續編沈協軒七十壽序云當是時吾浙軍務肅清以整頓鹽綱規復引地爲善後要策同鄉張君竹齋承辦浙西鹺務招君爲助君方講習農桑謝不出張君固請乃出而爲之規畫張氏之業勃然而興大府知君才卽以君爲嘉所甲商

烏程縣志太湖救生局在胡澗寧壽寺中光緒二年創置各紳士呈請浙江巡撫江蘇布政司批准于上海絲業公所每包撥提捐銀二分充經費卽用湖中各船懸賞施救每救一人給錢四千死者給錢一千將覆得救得保人船無恙者給錢六千冬則各發衣被以資更換凡有要口設立標燈以便黑夜識認董事周昌富金恩綬吳柄樞吳承洽吳承源張堯淦陳根培姚鑑徐兆蓉高汝鎔吳錫麟鍾榮森吳之璋震澤張紹箕盛際唐皇甫澄曹奎三年復設分局于長興境

談熊江掩埋備覽集證余之族叔殿勤公世居茗東之通津坊娶雙陽徐氏生一女斷絃後不復再娶自後依人作嫁歿於道光辛丑越庚辰春幾四十寒暑矣其內姪徐萬成忽夢殿勤公言我二人久假汝地未歸故土垣頽屋破何可容身望轉致族姪熊江速爲更新以安泉下時萬成抱病不克親爲通知乞鄰友吳大龍轉言始末方知公及孺人浮厝雙陽明日往見其棺

破敗不堪爲之悽然久之不得已檢骨入壘送往祖塋安葬不三月而萬成病亡若不早經夢託誰爲指其殯處况無子嗣卽族中有年人亦未必悉也公其靈哉抑誠足感神歟

又辛巳冬震澤同善堂至浙湖南潯鎮梁王兜掩埋有白髮老人自西北攜杖而來時堂工正在配骨老人細視良久乃曰寒舍屋後有無主圻棺一具特相請乞埋之間何居曰村北許之老人引至其地果有一棺磚瓦雖圻而棺木依然蓋由無主失修善堂掩埋例必暴露而後動此棺尙可耐久未能妄動而反於路瞥見桑園內做衣敗絮委樹根旁有零骨星散細檢之得下臂骨一件輔臂骨一件手掌手指足跗足拗足掌足趾等骨大小三十九件復向老人家問之曰此吾鄰之節婦也數日前

其姪雇工檢骨入壘想工之不慎遺骸至此命子邀其姪壘將遺骨歸併壘中夫節婦生前之苦節志也死後之埋葬理也節婦之骨不當分爲兩地天道也故天假手於老人以不敗之棺而謂之敗引至其地瞥見其骨問其由合其體知其節矣

紀福壽仲景筆記潯北張書常家擁厚貲年少喜徵逐寓居滬瀆與滬人朱子鬻友善訂金蘭契焉光緒丁未冬張將歸潯先一日宋與貸銀若干張拒之翌日宋來送行再申前請張拒之愈堅宋乃于袖中出七響手鎗彈數發知張已歿因以鎗自向腦猛擊而斃張年固未逾三十也比匪之傷可爲炯戒越數載張有庖丁某嗜煙酒逋負累累主母顧氏心弗善也擬易之某隱憤在心值臘杪主母誕辰先期購信藥欲于麪中雜下之屈

時天忽晦冥雷聲隆隆乃吐實而止是夕人靜後復用竹竿縛稻草以火油浸之將火引燒拋至間壁主人之卧房詎料竿上之火至柴房遽落延及廚房欲逃出而門已斷乃以廚刀自刎於小池旁傳曰天道遠人道邈觀此臘月之雷門外之火天道果遠乎哉

墨溪賸墨光緒八年有匪黨扶老攜幼若流民然名鐵算盤入人家乞茗取火一應其求金帛旋被攝去法華庵僧璞存積鷹銀千圓懸諸屋梁一日有男女數人僞爲乞食迫去僧檢視所蓄塵封如故鷹銀已失予從弟禹疇家衣裳四笥同時被攝一空

又家芋卿先生善六壬數有友人射彩票求先生占之先生曰利西南不利東北此去第三家有鬪者購之如君意友如其言見二人象戲頓悟購票果獲彩其姊丈吳念椿時任湖北黃陂縣問休咎先生爲占曰遇庚則復矣旋以事降階至庚戌得復其奇中多類此

李氏宗譜聯僊公負豪氣廣交游以時局岌岌常抱杞憂歿後俞曲園太史輓云范文正秀才任天下顧亭林匹夫憂國家於君見之到潯溪相逢如故舊在吳下每歲與周旋而今已矣
李慈銘越縵堂日記丙集光緒七年八月廿六日記是日邸鈔會稽教諭選錢塘舉人王彥起蓋汪謝城已卒矣謝城名曰楨字剛木烏程人壬子舉人承其母教家富藏書邃於校勘及音韻律麻之學亂後所儲悉毀貧老無子得吾邑學官以終余居

憂時曾一二往還聞其方譏歷史朔日攷未曾索觀及入京師音問遂絕方思歸里相與商析疑義編輯古書爲名山老伴忽見徂謝深以資咨海內學人至今殆絕不獨爲一人惜也謝城所箸書見者甚尠卽所刻荔廬叢書亦僅見四聲切韻表補正歷代長術輯要古今推步諸術攷等數種而已

采訪冊同治十一年里人許香谷業湖絲往來潯滬一日行至閔行遇風覆舟幾遭滅頂歸告表叔周味六

昌熾

時周爲上海

絲業會館董事憫浦南風濤之險謀諸同業鄉人陳竹坪

煦元

劉貫經鏞諸人由絲商籌欸設立閔行救生局於春申閣東偏

造巡船兩艘遇風則羅巡更集漁船編號訂立貼費章程遇險

協救並捐置市產以爲經常之費由陳煦元等稟道署立案勒

石局中迄今不廢

又宣統二年農工商部奏設南洋勸業會金陵城內每省各建一館陳列出品以農工商部右侍郎楊士琦爲審查總長以次爲審查官吾鎮大理院推事金紹城充美術審查官分省試用知縣金紹堂充機械審查官審查既畢第其甲乙分奏獎超等獎優等獎金牌獎銀牌獎凡五等吾鎮梅履中以梅恒裕絲行所出繡麟金鷹鐘等經牌得頭等商勳又銀鷹飛馬黑獅荷花梅石梅月等牌得超等獎吳其楨以其昌絲行所出金蝶經牌得頭等商勳沈秉鈞以沈天長絲行所出鬪雞經牌得二等商勳又沈鑑記絲行所出金駒經牌得超等獎邵月記絲行所出青獅經牌得優等獎亦異數也

南潯志卷五十八終

南潯志卷五十九

里人周慶雲纂

志餘十 詩話

高士奇天錄識餘沈富字仲榮行三人因以萬三秀呼之元末
 富甲江南其弟貴以詩諷萬三云錦衣玉食非為福檀板金樽
 可罷休何似子孫長久計瓦盆盛酒木絲裘萬三不聽貴遂隱
 於終南不知所終 洪武初每縣分人為哥畸即官秀五等家給
 戶由一紙哥最下秀最上等中又各有等
 鉅富者謂之萬戶三秀如
 沈萬三秀乃秀之三者

潯輯董志藝文載董份敝廬始成曹侍御過訪見贈次韻奉答
 詩云故里初營水石居擬將蕭散當園廬漸裁蘿薛思成幄愛
 種芭蕉為學書卧向烟雲朝日過坐依河漢晚涼舒非君載酒

追懼宴誰慰談元寂寞餘今攷泌園集此詩首句故里作帝里
蓋指都中邸第也乃改竄編入潯志謬矣范氏潯溪紀事詩注
亦沿其誤

蠅鬚館詩話董裘夏先生爲其祖遐周先生言行略曰先生述
董氏家語近始潯川言始祖仁壽公自梅林遷潯上里中呼爲
三老董公元末行中書省三辟之公歎曰龍不隱鱗達者深痛
竟不應遂鑿石爲船以見志曰此船可爛吾其出矣遐周先生
曰北宋徽宗朝吾梅林第一祖金紫光祿大夫貞元公與蔡京
背馳者苕中父老至今傳詠其詩有三槐九棘浮雲外一樹寒
梅寄我心之句吾先世世有隱德吾欲草創石船志用昭示吾
後人也然石船志卒未就又曰范長倩先生允臨書牘曰故人

童遐周大宗伯之孫黃門之子儀部之弟鹿門茅先生之外孫
而稱館甥于沈大司空泰垣先生然遐周自拔足雲霄之表是
能讀三墳五典八索九邱文心開闢巨靈擘山磊落有古節士
風槩使天下不敢以富貴目梅林氏者吾遐周之力也又曰先
生晚病足杜門著述體清羸自爲瘦居士傳行世輯吳興備志
未竟崇禎戊辰八月廿四日卒前一日猶兀兀點筆也年僅四
十有三

湧幢小品余與董伯念分詠走馬燈董正雄盛余結曰炎炎誰
稅駕蠟盡是歸程伯念捏紙聳然

蠅鬚館詩話董遐周先生鑑曾祖母之曾大父也所著有吹景
集凌忠介公義渠爲之序其書長於攷訂實在楊用修胡元瑞

之上嘗記其癸丑春夢中得句云石鏡逢秦女山精照落花政使醒時爲之未必奇險乃爾又曰癸亥長至第三日夢與孝若舅看月得句云便作一庭白虛堂分浩然甲子二月二日夢閱孫孟樸詩褒有攜妓入山寺詩僅憶二語云織裾禮精舍殘日射人黃亦俊語也夢中爲詩幻矣夢閱友人詩而成句則更幻矣先生所著有靜歎齋詩及廣博物志尤精深內典其靜歎齋嚙記曰雲棲大師初參悅心叟叟問云汝何處人師曰浙江人叟曰卻爲何事師曰特到這裏來求和尚開示叟曰你在三千里外遠遠來開示我教我將甚麼來開示你師當下領悟師北歸住吾溟豆腐橋廢寺中苦行三年無知者由溟至雲棲卓錫可補塔銘之闕又曰聞谷印禪師神識湛朗具正知見昨過溟

之祇園寺余往參禮茶次云如天命之謂性居士作麼生會余無對他客有拈紫陽語者師云不是良久云莫之爲而爲者天也莫之致而至者命也這便是現成注腳按此論開自祝京兆京兆晚歲大有悟入今爲吳中王路菴伽藍袁石公有記刻石甚異也此皆吾溟鎮之掌故故具著之

敝帚齋餘談吳江令祝麟初名似華初到以風力自命時南溟董氏有田數萬在吳江祝立意苦之未幾以暮夜得解吳江人爲一詩曰吳江勁挺一莖竹纔逢春雨便葉綠青枝一夜透干梢登時改節彎彎曲竹謂祝姓董禮部號青芝用事沈醫生號春宇葉六則心腹書辦也又吳俗呼現錢爲梢故謔語云然此辛卯年事

金以銘鞠逸吟廬雜鈔朱文肅未第時醇謹老成不屑以浮華博虛譽時董潯陽宗伯家居素以文名里中習舉子業者咸切就正董亦樂於獎勸乃約浹旬為期與諸生集東藏禪院命題角課以月旦自任焉朱所居與禪院相去僅隔一溪依期赴約董奇其文每擊節不置一日董見諸生環侍執禮甚恭乃欣然曰滿園桃李皆春色問東君誰是先生無以應朱輒離席對曰一天星斗煥文章唯北極堪為主宰董愕然由是益奇之後朱登第位出董右積薪居上殆亦有預讖歟

錢謙益試拈集謙益夢與李長蘅談詩長蘅口誦一絕句歎其清婉有味云是湖州董伯念登第後有寄作也覺而記之舊巢雙燕到依稀風入疎窗燭淚肥短雨輕寒催曉夢夢中渾未着

朝衣

蠅鬚館詩話星名次第列銀光點將標題當飲章聖主青年方好武卷頭先問李天王此明時天啟宮詞也原注曰或有用水滸傳罡煞星名配東林諸人以供談謔之資如托塔天王則李三才也及時雨則葉向高也崔呈秀得之名曰點將錄佳紙細書與天鑒錄同志錄同付逆賢逆賢乘間以達御覽上不解托塔天王為何語逆賢詳述溪東西移塔事意欲使上知東林強暴有如此徒所當翦也上傾聽嘖嘖若恨不同時者逆賢計阻匿其書逡巡而退此詩共百首舊題虞山陳棕著今閱點將錄內有吾潯朱相國平涵在錄汪志按錄云地伏星金眼彪大學士朱國禎施恩鑑按平涵當日不第見於此錄即東林籍貫浙江十一人朱國禎居其首又盜柄東林

夥東林盛楊時喬鼻祖吏部侍郎朱國禎南司業先之歸德江夏託足後著湧幢小品伏挺擊紅丸二案得大拜此非吾潯溪史冊之光哉

楊復吉夢闌瑣筆唐韋刺史應物爲蘇州郡神祠在府學中祈禱者往宿輒以平日詩句示之有楚人遊幕吳中家無音耗至廟祈之示以居閒始自遣微感忽難收之句後旋歸其妻已歿惟一女在焉始悟此詩下聯乃歸來視幼女零淚緣纓流也一士人夜在學之西廡見韋公着大冠絳袍車騎人馬旌幢繖蓋並從祠前大椿樹上冉冉騰空而去董若雨爲作迎神歌曰韋蘇州山空無人霜葉滿寶幢雲馬何時返又曰韋蘇州山情水性詩骨寒安能局促爲神官

蠅鬚館詩話潯上趙長文先生爲董若雨先生之師所著有乍醒詩草今亦罕見嘗得句云斜陽射遠水故寶雲洗藥池編有憶里中趙長文先生詩云鈔詩翻釘時文背作隸驚抽草草心憶著斜陽射遠水市樓句子有人吟蓋以此也豐草庵前集又有趙先生乍醒草序

計發魚計軒詩話董若雨先生有怨鶴行事旣悽斷詩亦古雅絕倫序云客有南州生少年遠游不得意流館西吳閨人鬱鬱以歿一日託形野鶴飛集生館值生醉甚對鶴訴愁鶴忽墮淚生悶絕旣而嗚咽爲閨人語曰君不如歸去我死矣魂魄渡江尋君至此言訖而蘇鶴亦飛去余聞其事爲作怨鶴行復成白鶴怨二首白鶴復白鶴獨立兀如醉驅汝汝不飛那作仙人驥

解一不飛亦不舞斜陽傍行子低頭語白鶴惆悵儂如爾解二白鶴

長鳴行客沾裳白鶴淚垂一何琅琅鶴鳴向自可鶴淚愁殺我

解三呼郎來前念郎愁苦儂不慕封侯願郎還故宇欲知腸斷絕

衣上吳山雨解四夜逐巫山雲搖蕩五湖裏天風知妾恨吹渡蘋

洲水解五幾回夢裏度金微此夜蘋洲喚客歸與君化作鴛鴦鳥

越水吳山只共飛怨鶴啼痕染客衣愁魂歷歷是耶非從今添

入相思譜不羨當年老令威按鈕秀鮪贖其怨鶴行詞句稍有

兀如醉驅汝汝不飛那作仙人驢不鳴亦不舞斜陽傍行子低

頭語白鶴惆悵儂如許白鶴長鳴行客霑裳白鶴淚垂一何琅

琅鶴鳴向自可鶴淚愁殺我呼郎來前念郎愁苦儂

不願封侯願君還故宇欲知腸斷絕衣上錢塘雨

幾及百人吾里董若雨云墮馬新鬢髮半垂海棠片片濕胭脂

簪花自愛花間影休向傍人間可宜董本諸生後出家名南潛

又董若雨一夕與其二子樵末論詩未偶吟唐人軍敗鼓聲死

之句因復拈死字令各呈句以詩都不得佳遂口占云旗紅閃

落霞甲麗明秋水馬上響刀鐙輕軀為君死可稱警絕

魚計軒詩話寶雲詩集為董若雨先生出家後所著其從子芝

筠漢策序云先生糠粃世緣冥跡高蹈瓶錫所至唯恐人知故

去而不留即所作詩亦湔浣紛華殆盡又云楚齒落梅靜睇鴻

雪則有畫石編西荒編操艇鳧蕩搖藤嚙雪則有洗藥池編船

子往來倏忽無礙松飄紅墮聲冥太空則有積雨編夕香編掛

瓢集拂雲集可謂得其意匠矣

又月函大師嘗和江村乞米詩云煙簑一領學漁師趁着柑黃

霜翠時飽喫江村冷焦飯蓬窗對和叩門詩冷韻孤垂幽標獨
拔同時確菴和尚曉青愛之遂和韻至七十首題曰江村擬韻
編如冰雪清懷老此師貧無錐立歲寒時藿鹽自飽空山腹索
債敲門半爲詩煙江萬頃一鷗師句裏雲濤怒立時末代斤斤
守繩墨書生原自不知詩其傾倒至矣

又詩之起句最難得佳月函師詠蒲扇云能使山堂下江湖風
浩然發端警策不意得之小小題

又詠水仙花昉自山谷老人近搜得絕句三首皆可喜者歸安

沈鳳于爾燦云青磁文石護嬋娟移傍銀燈倍可憐應是祝融

峯上女夜深環珮下溫泉自注祝融女丁芊嫁元冥之子王夫共學水仙居于溫泉又前輩

董若雨說云肌膚冰雪縞衣裳洛水神妃試淡妝不用花名重

錫賚獻之舊有十三行董南谷浩云碧玉叢中短短枝綠衣素
面大寒時水仙祠對孤山面本與梅花有舊知

楊鍾羲雪橋詩話董若雨名說後爲僧名南潛有豐草庵詩集

蠶豆詩云誰賦田園雜興題琅玕記取夏初垂喜看桑底新懸

莢恰值蠶眠未吐絲細雨賣茶聲過後竹煙燒筍火停時沙瓶

漆櫚分前詠豌豆今逢第二詩自注誠齋蠶豆詩有沙瓶新熟

西湖水漆櫚分嘗曉露餘又言蠶豆未有賦蓋豌豆也吳人謂

之蠶豆姜西溟曰吾鄉以吳人蠶豆爲豌豆而以吳人所謂寒

豆者謂之蠶豆至今猶然見湛園札記上元孫韶蓮水在阮文

達幕賦瓢兒菜云嫩葉如瓢飽露華白門佳種勝黃芽鋤當顏

巷三秋晚來趁吳帆一幅斜小雪時光人中酒故園風味客思

家使君淡泊甘如許海玥江珧未足誇二詩頗相似

蠅鬚館詩話孤游只其茗帚行得地不算烟水程埽治一片受足地罷遣亂葉紛縱橫百無所能昔鑄印老充炙背蹲南榮寺廊供職職自補帚輕臂緩猶堪擎煩將迂嬾訴主者乞假寸晷聽黃鶯此寶雲和尚埽地歌自題漏霜茗帚圖詩也其圖為海山呂時敏學所寫一頭陀黝然而長頤靨面目蕉萃短髯禿髮手持一帚卻身而罄折余見之于紀氏殆舊藏高足弟子大韶家今復歸董氏海山畫名已見秀水張徵士庚畫徵錄曹敦山先生做帚編有呂海山傳若呂君者蓋亦吾潯之方伎不可得而泯也汪志按敦山于傳後自記云余十五歲時曾一識海山今幾五十年矣海山歿已久已已仲夏忽夢海山乞余作傳寤而奇之頃刻成此

雪橋詩話續集董若雨首陽詠云草笠古鬚眉首陽一樵子擔柴入都城閒話青峯裏云有兩男兒飢死西山陞白髮齊太公泪滴青蘋水還願召公言采薇人已矣余謂當日之為太公者雖出處異趣或尚有念舊之思若在今日則盜憎主人方謂二子為好名而胡不遘死也錢辛楣所為若雨傳稱其詩荒淡清遠有云孟郊不在唐聲在吳山雨又云沈珪對膠法象先瀚絹理俟其物性窮始得浮氣死蓋自評其詩云爾所著書甚眾辛楣得其手稿數百葉皆志乘所未及舉者稍次第之合題曰補樵書補樵南潛漏霜皆若雨自號

蠅鬚館詩話豐草菴集張非翁為余買書志感感恩聊寄綠葵箋重結他生文字緣門外苦催賒藥券人閒誰假買書錢空登

西閣日相望同在南村竟各天萬卷子孫能永保只教世世頌
高賢蓋張與遐周先生交好宜其惓惓如此故豐草菴文集又
有書先君贈非翁長歌墨蹟後曰每欲搜羅舊文集先人遺事
爲高暉堂家語一書如東生能始諸先生集中贈和之作爲詩
文緣雲栖憇山兩大師法語爲出世緣與閔康侯先生讎書討
論諸文爲著述緣先人集中前後遊覽名勝諸詩爲山水緣先
人手跋碑版舊文名賢墨蹟諸文爲圖書緣清緣畢集子孫永
寶甚善恨病未就也先大宗伯手評兩漢書真本落人間非仲
先生力購歸先人先人手書長歌爲謝非仲先生義甚高家語
圖書緣此爲冠矣昔康侯先生家富藏書天性嗜學如劉伯倫
之於酒謬謂余讀書無經生習氣辛壬以後或徵奇字或證異

聞尺書日走潯上病甚猶強起寄書于余論同名錄二百餘字
言微楷細也康侯于余家殆世有著述緣而數年來非仲先生
授經南村憐余愁病則爲余買書故病孔雀編載志感詩有萬
卷子孫能永保只教世世頌高賢之句非翁于余家亦世有圖
書緣矣非仲家居湖濱之吳淞故集中又有聞非翁卜居潯上
之作其他如題張文通先生古今經傳序畧云讀序畧者聽之
某世某年月日慎勿疾馳章句加深思始皇帝三十四年制可
丞相斯非醫藥卜筮種樹之書皆燒之皆燒之六經不絕如絲
故漢有京房故吳有虞翻故熙寧己酉孟冬望日文同有黃氏
易圖後題故淳熙四年丁酉冬十月戊子序詩集傳新安朱熹
春秋善惡並書聖如天覆無是非翁作序略師仲尼異同森列

人自知敬識時日寓所悲倡和甚多不能一一詳也

冬心廬雜鈔黃九烟先生詩云高山流水詩千軸明月清風酒

一船借問阿誰堪作伴美人才子與神仙此詩先生鐫作圖章

今存沈柳橋登瀛家又自鑱印文曰性剛骨傲腸熱心慈

王士禎香祖筆記黃九烟性簡傲嘗遊嘉善遇一人負薪過市

口作吟哦聲揖入詢其名氏曰崔姓名金友出其詩五言云花

落無人徑雲飛到處山七言云因風去住憐黃蝶與世浮沈笑

白鷗又云吟思白墮傾家釀坐對青山讀異書自號樵隱黃驚

異因與定交

尤侗良齋雜說黃九烟周星前明進士也楚人流寓吳中家貧

落拓不得意悲憤發狂投南潯河而死與鵝池生宋登春相類

然鵝池依徐宗伯學謨居禮數有加一旦懊惱辭去呼舟亂流

躍入錢塘湖死邢太僕紀之甚詳今九烟生無宗伯爲之食死

無太僕爲之傳沒沒千古良足悲也其詩甚多有圍庵集又作

將就園記蓋空中樓閣也又改韻千字文和予秋波六義皆甚

奇予與九烟初不相識一旦貽詩十絕其首云雲龍時地每

難同千古才人恨不窮踏徧吳門知幾度今朝始得見尤侗見

者訝之予曰無異也唐人詩題皆名而不字卽如子美詩白也

詩無敵太白詩飯顆山前逢杜甫可知今人少所見多所怪耳

因荅八首其末云遲我談心二十年眾人欲殺爾猶憐從今相

樂還相泣慷慨悲歌黃九烟或問黃先生名君而君字黃先生

何也予笑曰且讓前輩

魚計軒詩話黃九烟周星爲前明進士上元人鼎革後流寓吾
潯年七十忽感愴於懷自撰墓誌作解脫吟十章縱飲盡一斗
大醉自沈于水時爲五月五日往余有五日後弔九烟詩末云
嗚呼九烟眞進士同時多少曳朱紫狗苟蠅營何足齒先生之
魂長在水先生之名且不死

陸長春遜齋隨筆黃九烟生平著作甚多有山曉齋詩集惜未
之見查心穀爲仁蓮坡詩話載其遊冒巢民春暉園詩云夢老
吳山五十年今朝始得卧蒼烟三峰已叩生公石一水還尋米
芾舡海國衣裳名士會醉鄉花月美人天豪情勝事眞千古那
羨蘭亭共輞川

又吳江孫孟樸淳經營復社不辭勞瘁晚築梅綰居於南潯以
詩自娛其塞下曲云寒雲萬里肅秋霜羌笛吹殘柳葉黃寄語
閩中莫相憶從軍幾箇得還鄉詞意警策正使偷唐人不堪並
對梅綰居存草內刪却此詩何也

蠅鬚館詩話孫淳字孟樸吳江人爲嘉興府學生家於湖濱之
田義村與吳淞月港相近有別業在南潯曰梅綰居著有梅綰
居詩草其詩有自潯水入茗省求仲舅云貧將回到舅麴許其
稱生園鳥呼春樹山光開曉城皆可誦又有哭張天如悲婁吟
四首案應社之盛實孟樸一人之力當日有爲孟樸口號云案
頭一部漢書袖中一封薦書逢人便說我哩天如天如其風趣
可想矣

又孫氏梅綰居以爲在我潯溪者旣不言其處同人求之數十

年亦終莫可蹤蹟今讀若雨先生西臺編有重閱梅綰存草感賦一律云可憐清嘯靠湖齋屋任溪樵斫作柴杜甫亂來吟咏苦謝翱老後姓名埋難忘淡墨傳吟帖忍憶圍燈鬪畫牌十五國風曾踏徧平生幾兩破芒鞋五六一聯注云孟樸翁尺牘多淡墨欹斜少年喜爲葉子之戲據詩首二語則梅綰居故址還當問諸水濱

餘素府君行畧茗城潘仲曦年伯善詩嘗從其岳翁韓蘧廬游得其指授故詩律精整時時與先君子唱和嘗曰我悔不遊寶雲之門其清明日懷沅州龔甥詩芳草徑連寒食雨落花門掩夕陽天嘗雜誦之

又先君子曰往與裘夏江屏書田喜會限韻倡爲夏日田園雜興和者甚眾張丹宸有楊柳灘頭釣笠焦之句本師極賞乙亥夏家祠落成沈天與一聯云茲值櫻筍薦新適會松楸落構一時共賞其清新張晚歲甚貧然頗具風骨

又余游京師寓某紳天與適來就選來往甚密某紳嗣以其老也輕之堂中有菊因贈句曰茗溪主人人似菊庭前列菊菊如賓我來見菊不見主菊亦賓中作主人夫昔人不肯爲五斗米折腰豈欺我哉因決意歸

又董存素先生與先君子總角交試必同寓晚年往來尤篤家素饒適某房姪因伊戚媒蘖其間幾至爭訟先君子力爲排釋而止閔湘人有句云碧梧陰下收棊局紅藕花中滌酒筍先君子謂不孝端曰此汝岳翁晚年實錄也

雪橋詩話續集烏程董若雨三子樵字裘夏末字江屏舫字閻
 仙均能詩裘夏句如滿川風雨公無渡一軸圖書忽不貧讀騷
 醉便呼奴僕看竹狂思策子孫對句皆用孟東野語江屏哭兒
 二首云峽猿清晝雨沈沈病憶孱羸痛愈深誤把三生捐故紙
 纔餘一骨裹秋衾烟銷劉蛻埋文冢魂結方干及第心博得斷
 腸碑一統影堂哀輓字南金汲古粗經枉自勞藥爐聲裏煮莊
 騷抱來膝上王文度看殺江東衛馬曹友許傳文能橐稿弟思
 慰母諱焚膏病夫不作多時別新點秋霜入髣毛眞摯之思出
 以雅切自是詩人之詩原序兒名士驢字鳴遠學制舉業鏤心
 病羸而死死時纔十九年宗文一去長
 愁之杜甫奚堪熊子重來垂老之其寄子詩云晴窗淡墨箋朱
 通翁無望吟成楚些用代大招
 子草閣孤燈點杜詩會取通儒舊風格唐音宋理一莖絲蓋自

道其得力之所在也裘夏登朝元閣次韵云雲移樹影南唐畫
 雨洗山容北宋詞春閣捲簾人語寂青梅如豆燕來時碧澗磷
 磷走白沙風迴丙舍埽松花拈毫欲繪芝山景黛色雲巒似米
 家江屏雜言云縱縱破墨點金焦意氣橫生十丈綃餘瀋別成
 秋數筆小窗微雨急蕭蕭界破青山到眼詩驚人華頂句誰攜
 雌黃難徇時嘖笑只學毘邪杜口時繁哇一洗舊琴琶解穢頻
 將羯鼓搥玉茗紅泉重按拍雪蕉眞本落誰家抉髓披肝語自
 豪丹青贗鼎自難逃丰標縱或輸崔琰橫槩英雄肯捉刀談天
 炙輠小齊州蒙叟荒唐快溟游大塊浮青烟九點古今何處著
 窮愁宣和帝子六朝僧臙馥殘膏冷畫屏步履好尋蕭寺壁楊
 芝羅漢鐵樵鷹諸詩皆通畫理張鐵橋名穆善劍術畫入神妙

裘夏贈鐵橋詩有燈前宛轉公孫劍筆下驂騑韓幹圖之句鳴
寔詩如石如傲客當軒立風解留花著樹輕買得文魚添藻養
摘來春茗折松烹雛鳳清聲亦自可誦

又范電文司空璨秀水人居南潯甲辰庶常未散館以人才薦
改大興令縣故有隱糧一案白京兆發之藩司不悅以他事被
誣去任在廷有白其冤者世宗追思怡賢王嘗稱其能特擢河
南鄧州知州王次山詩三年輦下聽歌謳直節清聲到處留太
息賢王勤荐士重逢恩命畀名州陞萊州江寧安慶等府副使
廬鳳歷江南直隸布政使自湖北移撫安徽入參臺憲晉佐司
空乾隆辛巳文武廷臣及予告在籍年七十以上者各九人賜
游香山製九老詩以寵之電文自丙寅致仕至是與焉賜松岩

樂志額因以松岩爲號丙戌卒年八十七

冬心廬雜鈔孫世楷字維翰南潯人生於蘇州父潮有九子皆
早慧以次死維翰居長獨存居葑溪之紅板橋父以豆腐爲業
而維翰好讀書善吟詠顏其室曰半巢事親孝與人交油然可
親授徒里中有賢聲人稱荳腐才子乾隆四十四年三月咯血
死月餘父亦死其母載兩喪歸葬于南潯之野其家遂絕嘗爲
秋螢詩云臨風怯上露臺流雨積苔垣燄未收多半著人因不
熱故教零落到清秋人謂是天亡之兆云

戴璐吳興詩話董徵君

漢策

字帷儒號芝筠尙書份元孫博聞

宏覽范忠貞撫浙時特薦以科道用旋被臺參放歸忠貞殉耿
逆難浙人懷德建祠孤山芝筠往謁詩云淚灑西臺夢欲迷怒

南齊志 卷五十九
濤風急拍長提天涯渺渺無知己埋劍金庭伴鶴棲握機密啟
意躊躕篋有陰符返五湖却悔囊錐猶未試女牆望見夜啼烏
王崑繩孤忠遺翰序武林陸鯤庭先生乙酉死於難留書辭其
母及兄弟其兄麗京先生集一時南北殉難如倪鴻寶陳本叔
黃石齋諸君平昔往還書牘贈答詩古文裝潢成卷而附其書
於後題曰孤忠遺翰藏之後麗京先生亦遂棄家長往不返其
子寅尋之十餘年不得遇丙寅夏寅遇源於京師出其卷示源
使源爲之序按鯤庭先生名培以庚辰進士居憂未受職甲申
之變南都授行人奉命祭奠淮王而南都不守遂止山中杭州
下乃自經麗京先生棄諸生醫隱養母後母卒罹莊史之難幾
死乃歎曰吾向不與弟俱死徒以有老母母旣以天年終今又

遭大難幸免尙可以餘生食息人間耶遂棄妻子披髮入山寅
又以其辭家書數紙與小像并附此卷後今觀其像雉冠戎服
挾弓矢袴鞞縱馬而馳是豈山中學道之人哉又可悲矣初先
生罹難時家人俱繫獄吏籍其家裂此卷將燬之先生內弟孫
君宇臺奔入流涕白吏曰此無用物燬之曷若與我我義存放
人片紙卽諸君義也吏笑而許之事解復歸之先生此卷得不
失者孫君力也先生名圻季弟堦人稱梯霞先生某嘗訪之吳
門岸然高潔士也寅字冠周負至性亢爽有大志善文詞工詩
曠書亭集有零丁爲陸進士作云寅也敬白零丁尺半紙敢告
行路諸君子有父有父一去故鄉不知日月幾千里日月逾邁
二十五年矣請說軀體顏面皮軒眉廣額豐兩頤口輔鬣鬣微

有髭去時牡齒尙未落肩脾亦尙肥平生不怒多笑嬉目無邪
視頭無俱周尺一尋長過之請說裳衣少新製大布寬袍淚長
漬帶斷續繩衫裹臂孫孫子子蟻蝨萃有時捫之擲在地兩褶
敝袴雙足扉寒肌生粟暑生痲婆留鄉語聽易分問以經術辭
紛綸至若說易尤專門方州郇家味易根囊中口譜可等金匱
文方不自秘恒活人不昧財不逐禍緇衣黃冠無不可惠而能
以消息聞爲德者君報者我蓋麗京論釋後遊嶺南依金堡丹
崖精舍一夕夢至琳宮丹梯碧瓦中有神建龜蛇之旒寤對寺
僧言狀僧楚人謂曰此太和山也先生乃易道士衣往訪竟不
知所終冠周康熙二十七年舉進士旣釋褐微服往求竹垞效
東漢戴良體代作零丁一篇授之持以入楚云竹垞辛丑同王

處士猷定施學使閩章陸處士圻泛舟西湖遇雨云東風吹落
日西下北高峰欲往南屏路中流聽梵鐘迴船沙岸火驟雨石
門松不覺碧雲暮涼煙生幾重零丁序云予早歲以詩古文辭
受知先生遂定忘年之款自辛丑夏一別水尙知歸先生獨久
不返辛丑爲順治十八年湖州史案在康熙二年下距冠周戊
辰進士正二十有五年也

雪橋詩話潘力田與同縣吳赤溟居韭溪皆以南潯莊廷鑑史
案牽累事在康熙癸卯亭林汾州祭吳炎潘耒章二節士詩露
下空林百草殘臨風有慟歎椒蘭韭溪血化幽泉碧蒿里魂歸
白日寒一代文章亡左馬千秋仁義在吳潘巫招虞殯都零落
欲訪遺書遠道難西垞西陵後感舊詩潘安曾對酒吳質數論

文舊史悲難續斯人意不羣一為江海別遽作死生分淒斷山陽笛那堪歲歲聞力田與王曉庵友善曉庵嘗館其家講論算法常窮日夜曉庵每遇天色晴霽輒登屋卧鵝吻間仰察星象竟夕不寐力田著有辛丑曆辨

葉紹袁甲行日注三十日

按為清順治二年十一月

戊寅晴冷偶閱西湖志

載劉後村弔趙紫芝詩盡出香分妓惟留硯與兒二語韻甚會固無分香事硯有先人所遺一二不知猶存否金奉川送生魚五尾亦放之池共十五魚矣兩君意甚隆天涯旅況何以為瓊玖之報抵暮德謙與蒼頭至家鄉虜盜交訐人無生意途中胡虜絡繹舟楫難前嗣後信音終付之溟雲隴月矣故德謙南返途次許村偶遇一南澤船師為吾輩定之而拉其篙師亦同入

山蓋德謙逐客意已甚久也余自至安廬兩兒病皆幾死又死一僮無多囊橐盡耗醫藥間此行又無半錢粒米寄至無論久留取主人厭實亦不能枵腹存也次日即為整裝計矣

陳撰玉几山房聽雨錄錢塘陸景宣圻順治間以史案係獄事白後變姓名出亡過吳中有贈友人詩云小吏衝寒問遠津市門相見欲沾襟當年曾識南州尉搖手休呼梅子真後聞入羅浮山為僧不知所終同里洪昉思昇有答人問一首君問西泠陸講山飄然遠引不知還乘雲或作孤飛鶴來往天台雁蕩間魚計軒詩話閩湘人南仲居晟舍為冢宰某公諸孫天姿超絕書一過終身不忘世變後家苦貧之幾無以自存嘗詭他姓偕其配自鬻于塘棲大姓所著有碎金集寒玉居集潘太守尚仁

刊于淮陰詩特悽豔動人自遣云子規聲裏歎無家古劍宵鳴
 月似沙入夢屏幃憐夜玉借人庭館看朝霞鴛鴦獨立同根藕
 蛺蝶單飛並蒂花怪底狂生多感慨最悲涼處見繁華又與歌
 者王郎云翠揜修眉絳點唇內家裝束倍銷魂波寒雨淡春憔悴
 此夜因君一半温舞散歌闌缺月明海棠春困不勝情風流
 第一難忘處說罷芳庚說小名誦之如秋林夕照哀蟬抱葉而
 啼也

南溟備志嚴鐵橋丈可均曰姚經雪名淳楫或作浮楫譌順治康熙

間南溟詩老也五律如幽花隨地發野果隔垣垂灌花蠹避穴
 移樹鳥迷巢七律如窗虛正好看山坐榻靜偏宜聽雨眠絕句
 如水雲深處無人住我慣尋幽占得來草草結茅臨碧澗小扉

剛好對山開皆清穩可誦有水雲草不傳今人匙能舉其姓名
 矣

蠅鬚館詩話張爾就先生肩康熙初隱居溪南之石澥工墨竹
 一時推重鑑近在包山見其墨蹟頗多蓋爾就晚館於山之秦
 氏十餘年而秀水張氏庚作畫徵錄以為吳江人者誤也董芝
 筠有采菊詩為張爾就賦云誰傳義熙意千載託孤雲寂寂邱
 中琴音希世無聞張生抱幽興植杖南山耘根株發泉香和風
 扇秋芬四時樂澹懷庶幾達者羣據詩意蓋亦遺世者歟

又石澥張肩人但知其畫竹不知山水人物亦妙今按西廬集
 有題赤壁圖云滿目江山已可憐更憑綵筆著秋妍故人明月
 應相笑夜夜臙臙罩客船原注曰爾就為敬夫作嘗歎畫赤壁

無佳絕者以不知夜色故也嗟乎洞簫絕響孤鶴不來我輩過從渺如長夜知予心者試屬和焉又用韻贈張肩爾就云髀蓋繇來其密疏妒君容易讀難書必逢疑義輕車似每慨知交落葉如已信習忘同徙宅新傳卻老是多梳無思要自深思得莫道迢迢但見渠觀詩起句似爾就又知天學者賢者固不可測耶

棟花磯隨筆天衣禪師云雁過長空影沈寒水雁無遺跡之意水無留影之心秋寓報國水堂夜拈此語問人間有荅者余皆笑而不言故有溪堂夜話述偈云雁過長空碧影高天衣烏陣祕龍韜錢唐八月銀濤壯幾箇秋風慣弄潮

南溟備志蘇始芳潘似山太守妾著筠綠贖稿有瀕危口占與夫子訣別八首末云指上玉環如可驗他生重得侍韋公趙虹作贖稿序謂越十六年似山娶得沈大家詢其誕彌日時卽蘇姬卒之日時言貌舉止亦與前身酷肖癡情偶結竟獲再生詩言遂成讖語乃知齊諧志怪不盡無稽也

沈登瀛南溟詩文集錄玉汝沈老先生七表壽序康熙六年歲

次丁未季春鄧山通家眷社小弟萬言拜書按玉汝先生名皇

玉與瀛家同籍吳江之震澤鎮未分縣時而非一宗 國初寓居于

潯之墨溪與張閒鶴先生輩稱石交蓋亦明遺老也余旣得見

閒鶴所贈蘭石卷子于先生文孫退甫處復叩以先生事蹟退

甫遂錄此文以示余余曰非特玉汝先生當補入吾潯寓賢傳

若萬先生者又其一矣觀序文中日造余室句不曰余寓可知

不僅作數日留不知其何由而至潯留幾時而去也

幽華詩略姚景熹好吟詠亦山之猶子也與先王父棲園公先考檢齋府君為紀羣交時相過從府君嘗言其室人吳氏名端璵才慧早世有暮春云布穀鳥嘯三月暮牡丹花放十分春寒夜云雁逐寒來應有恨月從秋去久無情又殘花落盡春無影又花落空庭不見春諸句為人傳誦

遜齋隨筆姚存之先生號蘭仙南潯詩人與謝文若洲齊名予曾錄其春閨一絕今閱張秋水先生鑑蠅鬚館詩話摘其句云樓高初月上寺遠晚鐘沈渚烟沿岸合溪水過橋分花寒垂露重樹老得春先看松雲礙笠坐石蘚黏衣春暖花迷路巒晴鳥變音又風定爐烟留篆跡雨餘庭砌長苔紋當路野花難問種

隔林嘯鳥不知名俱似劍南集中句

又謝文若先生洲號散木祖籍餘姚後遷於潯為紀白雲先生遠入室弟子張秋水先生鑑蠅鬚館詩話采其句云薄霧不成雨夕陽開晚晴宿雲凝暮色小雪釀輕寒西風翻病葉老雨滴秋寒酸風吟破紙寒雨下深更炊烟隔茆舍嘯鳥在高林墻低不礙月屋老半遮茆秋水翁謂能造宋元諸名家堂奧惜未見其全稿

吳興詩話姚益敬字元吉玉裁女幼時誦木蘭詩問父曰朔氣傳金柝寒光照鐵衣著色實為大雅若鋪排過多恐近小說父大奇之適辛未進士扶溝知縣董豐垣早歿贈孺人著芬陀利居稿厲樊榭序以歐陽公目謝希孟有古幽閒淑女之風為比

蠅鬚館詩話陸翥聲先生賢英爲董南谷高弟少有聲庠序嘗作西吳竹枝詞云薛家鏡子最精良生練曳來半面光拾得龍盤書小字可知前有十三郎自注袁宏道詩薛家鏡子開生練案薛杭人也而業于湖予購一鏡開之止半面光如上弦月背鑄兩行曰湖州石十三郎自照青銅鏡子

魚計軒詩話董南谷浩登庚子科賢書才名藉甚無故得奇疾卧牀第七八年齋志而歿其春日枕上書懷云擊楫吾曾泝大江依然破硯守蓬窗療飢難煮書千卷呵凍空顏筆十雙身困藥鑪眠病鶴戶盈債屢吹寒虜壯懷僵折如梅幹雪壓霜欺勢欲降哀鴻本爲稻梁謀黃鵠今成籠內囚拔宅有天看砥鼎立雖無地且居樓形骸散木非梨果身世均堂任芥舟一卷南華

眞枕秘逍遙吾欲夢中遊八窗洞達對春妍悶絕重簾障眼前籠裏書生非一日帷中新婦已三年遊山祇許夢廬嶽訪友無能泛剡川枕席何堪淹歲月坐令絲髮漸盈顛儉歲簞瓢亦孔艱談何容易欲希顏典衣賤似鬻齊屨貸粟難於請鄭環無補空糜醫藥費多情休怨友朋慳詰朝喜動家人色縷縷炊煙上屋山四詩寫盡貧病無聊之況

又前輩紀白雲深嘗論作詩須有遠神讀者亦須有遠神以會之蓋遠則淡淡則眞眞則入於妙矣記其郡中卽事云零星小兩人初起寂寞微風燕未回城市不知春已半賣花擔上草蘭開可以撲去俗塵三斗

又餘姚謝洲字文若寓居南溟著有散木詩集五言如宿雲凝

暮色小雪釀春寒得意時開卷尋歡偶出門醉憑村酒力涼受古槐恩平隄成遠步涼月趣微吟炊煙隔茅舍嘯鳥在高林皆靜正雅淡有唐人風味

又歸安徐芷堂司馬德元在京師賦秋海棠詩四首和者自王公大人以下至方外閨秀殆無慮數百家刻成集後在金川軍幕重賦四首和者又數十家秋海棠亦何幸而遇芷塘歟記其後四首之一何年擁髻對秋光偶現前身未足傷曉鏡忽然舒笑靨鬢雲深怕染秋霜由來耐冷偏成性自小工愁別有腸寂寂輕陰人不見桂花巖畔是虛堂

又本朝冊封琉球國王必妙選詞臣以充使前此送行之什刻入別裁集者亦既彬彬矣近周贊善煌出使琉球紀心齋太僕復亨以四律送之云春融喜氣指龍荒稽首羣瞻竹冊光萬里使星懸地極五更曉日耀天章高帆展盡蓬瀛翠腥霧重開翰墨香破浪壯懷憑報國真看乘去好風長天子臨軒定品題玉函跪捧出璇閨恩垂異域歌還舞才選中朝璧與圭島岸日暄游巨鬣汀洲潮落集飢鷗遙聞鼓吹迎黃詔城外晴雲簇仗齊祝融擁護拜冠纓海色天高颭旆旌放眼始知輿地大恬波直作坦途行風清樓櫓騰鏐吹氣靜魚龍見水城自識使臣風采後百蠻讐服倍心驚禮成修貢出鮫宮玉帛梯航仰會同灑遍中山仙掌露攜歸兩袖舵牙風水籤記里常馳北斗柄回程又指東海外文章稱夙昔定知手筆擅坡翁不爲奇險之語自覺高秀故佳

又溫陂田進士謁選得大治紀太僕送之詩云天扶樓閣浩茫
茫曾向西風繫野航山合百蠻開大別水分九派下尋陽雲埋
舊恨羊公石秋冷疎煙雁戶糧此日送君君有意都來今古淨
琴張時刑部郎中吳桐村爲作畫幅以贈太僕復用前韻題云
暗水遙岑接混茫尋幽悵少渡頭航劇憐比部增離思寫送仙
郎到漢陽夜靜幾時同聽雨山深無吏換輸糧風光藹藹林居
樂合向琴堂素壁張三君生同里故相好也年來已先後下世
又生來不帶趨炎性老去彌增憚暑心前輩殷茲在赤珠句蓋
炎敲爲虐最是損人佳趣乃如國初僧悟塵淨覺云休言炎太
酷自有冷來時語到了徹恍置身清涼國土

又紀伯紫有真冷堂詩集按莊子舜之將死真冷禹曰註謂真
冷乃其命之誤嶺南許廉訪憲生辰誌感詩末云訓佩書紳真
冷在居家宜儉仕宜廉正用莊子也

又同里董凡夫民傑與余爲詩友庚戌仲春麻溪徐臨皋寄視
余新課六首余旣如數次和凡夫見之歎賞不置及病革手書
四絕句相訣別末章云潯西老友是詩仙拈出梅花句極妍籠
壁有香時觸鼻故應垂死聳吟肩不數日而易簣矣短箋猶在
每檢閱輒令我心如割

又同里前輩王谿堂起鵬少負詩名後以明經出宰清澗卒於
任五言如輕風翻燕子小雨放梨花風隨寒漏曉月向亂山低
竹韻春晴後茶香穀雨前七言如草將野色連荒岸雲放斜陽
過別村社雨一番江燕至春寒十日杏花稀三年寄夢秋風外

南澤志 卷五十一
一榻看山暮雨中皆佳句也

雪橋詩話朱介裴嘗謂遺山論詩絕句中如望帝春心託杜鵑及未害淵明是晉人可惜并州劉越石等語又述次山一首又亂後元都一首皆顯然自寓之詞按遺山論詩三十首丁丑歲三鄉作丁丑爲金宣宗興定元年先生年二十八歲在其登進士第之前四年雖其時蒙古兵已入燕先生自秀容避亂河南至是歲寓居三鄉下距金亡垂二十年不應預作淵明晉人之語以自況介裴此論失考至謂壬辰十二月卽事詩壬辰乃金哀宗天興元年十二月哀宗出奔河北踰年正月濟河使白撒攻衛州敗績遂走歸德詩蓋紀此一聯云只知河北歸銅馬又記臺城墮紙鳶蓋金白撒嘗放紙鳶置文書其上至蒙古營則

斷之以誘被俘者故云此說爲塙其神山考云案定襄縣志神山縣治東北五十里平地壘石如盤似所遺而成者元好問嘗讀書於此因題遺山明傳納誨遊記云神山孤立平野或以爲羣山之所遺也故又名遺山余考元集有壬寅正月九日晨起詩自注云時欲經營神山別業又有外家南寺詩云去國衣冠有今日外家梨栗記當年白頭來往人間遍依舊僧窗借榻眠自注余兒時讀書處也又有外家別業上梁文一篇自述遭亂後播遷情事頗悉合而參之蓋先生外家在定襄故兒時讀書於其邑因取神山之別名以自號晚乃結屋於此山所云外家別業卽神山別業也計壬寅之歲先生年已五十三時金亡已九年矣故上梁文所述皆亂後語又聞此山下至今流水潌洄

故集中有魚多只說牛家匯何處秋風有釣船之句自注牛家匯在神山下而晨起詩亦云只今東溪把釣竿蓋山國而兼澤國之勝者惜乎縣志語略而晦又失採本集諸條轉使人疑於無證若傳記述遺山之形名頗可據卻無一語及於元夫子者可知昧沒於邑人久矣余故因白蒹言而詳著其實至縣志載先生聖阜危樓神山古刹二律集中無之詩甚庸斷是贗作宜削也施北研注遺山詩甚略當據此文補之

又施非熊爲南潯老諸生不利舉業究心於金源一代事跡積數十年著有金史詳校遺山詩文箋其自題金源劄記云閒消我有肆簾風寓墨金源舊事叢野史功臣慙褚補圭齋諍友悔劉通書鈔冷局讐難遍字訂譌傳擬未工長此一編深篋底敢

言載筆附羣公自謂與錢詹事考異有不合處非敢立異本無事於操戈不欲苟同或難逃於撼樹平心論之但求公是其考世宗大定二十八年禁糠禪瓢禪云此習至蒙古始盛耶律楚材湛然居士集西游錄序西域九十六種北方毘盧糠瓢白經香會之徒釋氏之邪也張昱輦下曲肩垂綠髮事康禪淡掃蛾眉白可憐出入內門裝飾盛滿宮爭逐女神仙嘉慶丁丑嘗過黃蕘圃家小住五日與談金元史事如瓶瀉水無一停留爲跋歸潛志云夏六月過復翁家相知十餘年始識面也翁以余喜說金源事因出此舊鈔原校與鮑刻略同惟歸潛堂記之銅壺此作銅臺向閱鮑本壺字不解曾擬改作鞮字今見此臺字乃知舊本之足貴至太宗神射之爲太祖神功李純甫卒於元光

末王仲見爲王慶道猶子良由神川誤記不必校北研謹識沈子敦嘗從問業亦熟於遼金元掌故及西北邊地理

錢泳履園叢話余自束髮卽學松雪翁書至十八九歲最喜臨摹山谷業師林蠡槎謂泳受病已深仍以松雪爲退轉之法後每見松雪墨蹟輒留神披覽如黃庭經樂毅論汲黯傳過秦論及洛神枯樹雪賦頭陀寺碑歸去來辭之類不一而足中年爲英煦齋相國家鈎勒松雪齋帖六卷旣又爲齊梅麓太守鈎勒松雪齋帖六卷則余與松雪雖不同時若有深契焉者嘉慶十八年九月余始遊吳興求所謂水晶宮蓮花莊紅蓼灘諸勝皆草湮木瘁矣惟一品石尙在高氏一老寡婦家鷗波亭則僅存基址在蘆葦中松雪舊宅惟有一門甚低元時舊制也余徘徊

於門外者久之遂告之太守趙公學轍歸安陳公三立烏程彭公志傑刻一碣曰元趙文敏公故里七大字立於舊宅之前一時觀者雲集歸至南潯舟中夜夢松雪翁來謝面圓而白鬚鬢有鬚身着藍衫一如曩時在畢澗飛員外家所見松雪自繪小象者醒而異之乃作詩曰北海追魂迹已陳公來入夢又何因燕臺一宦原如寄公與中峯札云一官如寄鴻蹟千年自有眞爭說畫禪成獨絕但言書法亦誰倫雌黃卻怪華亭老不肯從公步後塵蓋董華亭一生評論松雪至老年則漸漸服膺乃知松雪之書未易言也

冷廬雜識器之有銘由來遠矣見於歷朝者不可悉數茲擇近人所作辭旨簡質者錄之中孫愈愚明經筆銘三寸管一丈舌

慎持之有鬼責

周慶雲家庭瑣語伯曾祖雨舫公家貧以筆墨自給嘗寓吳中與同縣高蘆洲明經湘爲莫逆交公善山水明經營乞畫長卷題詩其上並書扇爲贈其詩云前年與君遊靈巖千峯飛翠寒松杉去年與君訪鄧尉萬樹梅花雲鬢鬢愛山惜少買山錢棲遲幽谷嗟無緣歸來寤想已二載今生安得重留連壁間忽起三千疊屋底長生鎖雲葉仙人騎鶴下太清百尺寒泉撲眉睫君本清癯七尺身五十餘年長食貧胸中邱壑匡廬秀袖裏烟霞華嶽眞我爲寫向好東絹峰巒隱見時千變關荆黃范世無人絕妙丹青誰稱羨坐使風塵兩頰生百錢疇買蒲葵扇今君與我是同心江南共受霜霜侵兩鬢蕭蕭十指黑老猶挾瑟求

知音我更擘牋飲君酒醉畫峨眉眉插星斗置身絕頂問蒼天幾時得展擎雲手其跋云雨舫大兄先生爲余作山水卷子逋峭如黃子久蕭遠似倪雲林其清秀勁達之氣又在顧陸張吳之外世人莫知貴也因作長卷識其卷端茲又書便面以質推許之當否時嘉慶戊寅

又雨舫公遺畫希如星鳳伯父榆齋公猶存手澤道光癸丑其外孫閔朱點大寅爲題七絕四章其序云雨舫公姓周氏字佩璜寅之外王父也家於潯溪秉性沖淡志極嗜學至老不倦一時與之遊者皆茗東名下士如朱松舟温也癡兩贈翁以及鈕平齋祠部高蘆洲明經晨夕過從相與訂莫逆交平生工書畫尤善山水歿後散佚僅存遺藁一幅其孫貽齋持以示我曰此

南潯志 卷五十九
我祖墨蹟也子盍爲我跋之余愧不能成公家宅相而撫此殘
縑能無悽然動手澤之感爰占四絕並綴數語而題之於其上
先生系本汝南傳競羨高風說愛蓮象外偶然游戲處晴窗參
透畫中禪墨化烟霞筆化風神如秋水氣如虹層層繪出林泉
景不讓徐熙點染工寫得江山尺幅中半經設色半空濛卻慚
我乏添毫筆點綴難稱宅相功賴有殘縑遺後昆當年手澤至
今存一時千載名堪憶齋曰題應屬外孫

南潯志卷五十九終

南潯志卷六十

里人周慶雲纂

志餘十一

詩話

蔣寶齡墨林今話歸安莘芹圃開字季張家世武科少補武學
不稱意棄去專志讀書工八分繆篆兼善寫真及花卉尤精墨
竹爲沈芥舟入室弟子沈有女弟子徐湘生亦善畫爲作合焉
家極貧傭屋以處繼得其先世蓮花莊舊宅遂摒擋徙居求書
畫者不絕年末五十鬚髮皓然竟以勞卒湘生仍藉畫以自給
焉湘生名蘆本姓邱號南林女史湖之南潯人年未笄卽從芥
舟受畫法及歸芹圃倡隨之雅人爭羨之墨香論其畫謂絕去
脂粉余亦曾見所仿衡山小幅幽秀可喜上題絕句云那教胸

次暫相忘夢裏秋山引興長料得山中花已少半林紅葉豔斜陽靈芬館詩話又載其爲姚讀卿題雨窗懷舊圖云悵別心情未易描等閒誰與話無聊階前蟲語鐙前影記取疏簾第幾宵紙糊窗畔小玲瓏坐徹幽齋怯晚風落葉蕭蕭人不見雨中可有帶書鴻詩尤清絕五亭昨語余云湘生今老矣然猶能作士女及細筆山水可貴也

又吳晚青山秀字人虬震澤歲貢生善山水亦長寫生與吳興沈芥舟交善曾索芥舟寫硯灣耦耕圖又寄芥舟有句云吳興吾好友詩畫互磨錯時來信宿淹牀聯晚青閣生平詩稿甚富身後遂散佚吳枚庵懷舊集選存數首非其至也畫亦罕傳

續黎里志李聖英行三南潯鎮人厲居侯字圩嘉慶壬戌父某

病甫愈母以積勞致疾醫藥罔效聖英割臂肉和藥以進母病獲瘳人咸稱孝感邱璋邱璿徐達源陳赫蔡湘皆有詩紀其事計春樹楠廣文李孝子行云潛甫寄我詩云有李孝子孝子南潯人寄居黎花里今秋疫大行其母病幾殆孝子告天地焚香爲長跪弟兄方侍寢阿爺偶出市四顧寂無人割臂念輒起持刀不知痛進粥病過已純孝感天心效非藥石比我讀潛甫詩紀事宛良史以之代傳贊可以風世矣

遜齋隨筆吾鄉張秋水先生鑑冬青館集書綠牡丹傳奇後云此吾鄉溫氏啟豐於復社之源近日讀而知其故者鮮矣書中以管色爲烏有亡是之辭其實柳五柳車尙公范思訶據復社紀畧各有指斥其於越人疑亦王元趾陳章侯一流而吳興沈

重者以在朝則影黎媿庵倪三蘭在野則影張天如楊子常周
介生輩大致如風箏誤燕子箋亦明季文字風氣所趨而語語
譏切社長極嬉笑怒罵之致宜媿庵當日按試械時相聞人究
及書肆賈友而毀板厲禁之但今玩其編簡已經蠹缺無頭訖
可檢不知是原印抑係後來重雕要其詞藻有不能沒者蓋相
國之弟育仁暨二子儼伉倩人爲之謝英顧粲直用自況惜乎
名氏湮沒世有鍾醜齋不又取以入錄鬼簿歟如以爲三百年
國社所關則一莖草現丈金六身又焉得以宋元雜爨少之子
友汪謝城孝廉云考此劇爲吳石渠炳所作粲花軒五種曲之
一見黃梨洲思舊錄及李笠翁閒情偶寄吳半峰先生汝震購
得完本題一絕句云才華小願擅當場考試由來事不常莫負

綠英詩筆好可憐不及白丁香子與謝城從先生借讀謝城題
詩六首絕佳並錄於此國色天香豔綠英文壇藻鑑屬名卿牛
恩李怨成鉤黨王後盧前爽定評六甲幾曾窺閩奧一餐未免
誤生平亡羊臧穀誰優絀墻角真宜棄短檠清濁何從辨渭涇
虛名蝸角夢難醒方干賜第先黃土張奭應官是白丁假手成
文供衒鶯依人作計嘆伶仃蠹魚縱食神仙字爭及飛蛺變化
靈香名翕集氣凌雲操選方家詡洽聞梨棗精工傳合作芻蕘
險韻鬪回文隔簾有女窺羅隱弄筆何人敵左芬塵世茫茫知
已少祇應低首拜釵裙白描筆底解傳神拜殺荆劉派別真可
惜小才徒炫巧誰能薄俗更還醇清流貽禍機緣啟好事生風
指摘頻巡舖八义家學在如何翻情捉刀人或時怒罵或軒渠

南澤志 卷六十一
管色宮商託子虛名士本來如畫餅秀才乃有不知書坐雲轉
博聲華盛視月渾忘學術疏太息江河今日下蔻梢蒲齒度居
諸綸屏終始主恩長門戶紛紜政不綱千載史書垂法戒一編
院本管興亡偶存楮墨麻沙本合付衣冠爨弄場留與南朝誇
後勁春鐙燕子詠懷堂

雪橋詩話張秋水高郵弔秦淮海云南湖秋水亂寒煙小庾鄉
關感暮年四海詞名歐柳其蘇門交誼李張前醉回遠道藤州
夢山抹微雲學士篇一樹垂楊枚叔里西風閒拂酒人船其和
阮文達雲臺峰句云雨餘閩苑仙脾重花亞朱陵地肺通對極
工

墨林今話張秋水明經博通經史工詩文四十後卽棄舉子業

游心於山澤已而病風痺住林屋四載遊囂著書煙霞勝概朝
夕領畧時或寄興毫素作山水小幅不以與人取自娛悅而已
然好雅之士多持紙丐請亦弗能辭其畫不主一格工整蕭散
隨手爲之皆合古人意趣乙酉冬暮余客潯上曾以小冊一頁
求先生畫先生爲作潯溪歸櫂圖並貽詩云共此五湖岸君歸
歲月遲烏衣多舊澤馬磨少新知畫手應無敵詩篇自得師門
前上春水諒不負游期鈐有秋水墨緣印此冊今在計儋石處
先生著述甚富其已成者左氏杜解規過平西夏紀略喪服古
注輯存六書寤言天元一述海運芻言墨妙亭碑目考上林子
虛賦郭注存眞蘇氏詩案廣證及詩文前集五十卷洞書蠅鬚
館詩話若干卷海內先賢行略若干卷

冷廬雜識歸安楊秋室明經鳳苞博雅邁倫屢試不得志賦西湖秋柳詞以寄意前後積七十二首情味並勝於西湖竹枝詞外別開詩境摘錄於左以擬窺豹一斑云回首東風十萬條畫樓亞處鬪纖腰香車去後游驄散閒殺紅闌第四橋玉鉤簾幕自年年紅粉飄零更惘然惆悵披香春色好無人曉起聽涼蟬會芳故苑最魂銷花月當時如細腰悽斷御溝流水外昏鴉歸去認前朝霏霏涼露溼池臺太息芳年去不回記取總宜園內樹也愁天外雁聲來芙蓉吹墮謝家船隄樹重攀又六年自與秋魂共零落行人愁踏故宮煙露條煙葉漸闌珊翠館人歸夜正寒月落平湖秋色遠夢回幾度卷簾看

雪橋詩話續集董增齡字慶千號壽羣烏程廩生著有國語正

義春柳詩云鵝黃初染色偏嬌旅客無端折柳條最愛石塘春水綠半奩波鏡映纖腰

又右安門外中頂歲以四月初一開廟吳懷峰比部詩十里城南綠滿川春風春柳自年年名園幾廢靈祠在孤負看花穀雨天都人士女競喧奔花市闌珊廟市繁已見田田好荷葉風流憶殺趙王孫

冷廬雜著温稼生工部余癸巳乙未入都皆與同行留寓全浙老館與鄭拙言學博三人同院而居余與拙言閉門習業稼生則歡場結客角酒徵歌偶一拈毫頃刻成文才鋒鏗鏘余自愧弗如也丙申同捷春闈授職後以工曹需次稽遲鬱鬱不得志益縱酒自放癸卯秋以疾卒於京邸年僅四十二余哭以詩云

慘絕郵亭計天涯別淚潛羈魂千里外幻夢十年間少妾淹空

邸新納姬人衰親慟故山傷心江上雁同去不同還憶作春明

客深情獨我知癸巳乙未計借入聯吟花寫韻贈別柳攀絲丙

夏捧檄出都君餞飲於陶然亭賦詩贈別豈意重逢日翻成永訣時庚子秋晤君於

詎知竟千秋身後事珍重一編詩稼生工吟詠善寫山水嘗自

題畫扇贈余曰春明聯袂已經年鄉樹蒼茫隔遠天記取他時

歸隱地白雲青嶂雪溪邊斯人已矣遺墨猶新每一展誦輒為

歛歔累日

墨林今話烏程温一齋純幼即受畫法於沈芥舟好儲古人法

書名印手自臨摹故兼善篆隸工鐵筆詩古文詞亦靡不究心

嘗刻古今秘籍數種阮雲臺尚書視學浙江時極稱賞之後官

處州學博年未五十卒於任馮墨香云一齋山水渾灑淵懋力

追董巨為吳興第一手沈五亭名燮之歸安人又稱其小品尤有別趣

以姚雲東陳孟陽比之配嚴氏繼配吳氏俱能畫嚴名文字淑

暉烏程人幼聰慧善吟詠年十七歸一齋一齋謂之曰能畫而

不能詩畫即無韻能詩而不能畫詩必無神遂潛心學畫不數

月而能花果嘗自題石榴四首已載墨香畫識余尤愛其病起

一絕云蕭蕭秋雨織烟絲徧繞窗前簾幙垂如此輕寒禁不得

莫嫌病起曉妝遲惜不永年僅十八而卒吳名德韞字恆卿能

彈琴工墨蘭一齋嘗篆花中疑有曲絃外欲傳神句以貽之

又竺公按即東藏寺達曾號竺峯所著香影庵詩半皆己丑年所作和余寒

宵煨芋詩云風聲蕭蕭響隔廊寒宵對坐未覺長月到小窗見

南漳志 卷六十一
松影詩聯短句搜枯腸南鄰送炭舊有例稱我冬來煨芋計地
爐熾火暗分香只有兩人知此味三更已過興尙賒解渴更煮
松蘿茶寒威凜冽敗棉薄只恐來朝吹雪花早起五絕云凍雲
遮日光黃葉落如雨草堂門未開但聞鳥相語他如半塔頽成
畫一溪清入秋磬聲涼似水茶味澹於僧並可采入禪林韻語
又證淳亦震澤人初號梅田其稱墨緣者余所贈也幼習楷法
兼畫山水俱有秀挺之致余初至潯在乙酉秋假榻寺樓墨緣
以畫請業願爲方外弟子余并勉其學詩相契甚洽越四年復
至則其畫與詩俱進畫更超詣欲參香光之席蓋其慧根旣深
又加篤嗜故能如是之速武進湯雨生都督今藝苑領袖見其
所作極稱賞卽馳緜素乞其畫而墨緣已抱疾不能起辛卯六

月竟化去年纔二十九惜哉墨緣體素弱清削見骨而負氣兀
傲其於緇流罕有合意獨喜親才藝之士固亦矯矯自拔者詩
多散佚僅存己丑以前所錄本菁山偶成云白雲破處鳥飛還
欲上苔梯足力艱松竹密蒙青不了誰能畫此夕陽山贈曉峯
云一笑相逢氣誼投澹無言語對清秋山童正藝茶爐火與坐
松風閣上頭靜院云靜院沈沈秋氣添月痕如雪滿前檐關情
籬下霜枝瘦卻恨清香不透簾題費子茗環溪種柳圖云溪流
十里漾漣漪溪上應須柳萬枝來歲春風二三月知君栽徧葉
如眉次第煙光染綠痕流鶯聲到竹間門漁人打槳重來此忽
訝濃陰又一村冬夜步月五絕云同行過溪西何處月明好一
碧浸澄波下視天影小其他可誦者甚多余爲別錄一冊以俟

賞音

遜齋隨筆予少時嘗倩墨緣上人證淳寫天台采藥圖名流題贈佳作如林吳鑄生先生詩云詩心飛向仙山住春弄桃花千萬樹桃花桃花落復開劉郎阮郎來不來神仙附會空數典拔宅雲中有鷄犬仙山若有仙夫妻神仙亦被情關迷士龍士龍今才子侘傺窮途託旖旎忽然腕底來春風筆端齊放桃花紅桃花紅作可憐色無限相思骨爲刻翻然一笑成子虛武陵亦有迷津漁便得胡麻種且勿大可桃花作飯喫情絲縷縛顛乎顛風吹花片隨雲烟美人香草離騷有羨爾風詩真好手披圖不願長鑱將字字喜作桃花香姚雲門孝廉詩云神仙可望不可卽卿嬾仙笈讀未得神仙之說本虛無劉阮胸中早歷歷不

然當日挈伴登天台鸞迎鳳舞岩扉開何爲胡麻不願喫掉頭仍入紅塵來君也抱遠志落落頗自異示我採藥圖其中有深意想見濟時一片心煉丹不爲成仙計石梁洞華頂峯十年前憶停游蹤爾時惜未與君同雜花滿樹人何處流水無情送落紅吳右岑詩云千樹萬樹桃花紅是耶非耶山之中落花滿地掃不得怕向人間再流出阮劉去後幾千年美人常抱白雲眠當日重來已無路何人更問天台天家常飯比胡麻好我輩閉門苦未早勸君不用荷鉏行黃精茯苓地上草君才況復疑謫仙君詩直似李青蓮有時直上蓬萊頂俯視下界皆雲烟采藥采藥復采藥我爲披圖意深惜有泪不肯尋常揮逢人只道遊仙樂遊仙樂樂何如春風撲面來徐徐聞說山中忘甲子桃花

南溟志 卷六十一
紅得千年無屠半墅先生若儀詩云古蹟荒唐莫認真仙家迎
壻本無因畫師會得空空意只寫桃花不寫人何處清溪隱釣
罾泉明一記誦猶能鄙人也有尋仙約不向天台向武陵殷譜
經宮詹時爲秀才詩云往事分明說阮劉如君綺想占風流比
他前度仙郎到只恐雙鬢已白頭怕說荒唐被世猜也曾因夢
入天台卻逢彼美儂親問笑道從無此客來王硯農徵君詩云
青山不碍白雲遮□□□□□□采藥仙肩渺何處教人憶
煞舊桃花誰寫丹青一幃留分明瑤草滿靈邱人間已徧傳新
句肯信曹唐是夢游王粟海先生紹軾詩云手把長鑱劇藥嘗
膏精飯共紫芝香近來米價如珠貴要乞仙家辟穀方吳壽駝
先生星南調南樓令詞云何處種靈瓜雲深望裏賒想難忘溪

上人家笑說送歸劉阮後猶賸有舊胡麻一徑入谿研分明認
未差請先生寄語烟霞可否山中容我去添一箇看桃花董鑄
范先生調臺城路詞云赤城華頂縈詩夢丹青爲杼幽抱界道
泉飛立標霞起藥氣千巖春曉林深路杳待鬪取芝童覓來雲
表也擬偕行青鞋布襪辦都了同來會仙石畔乍相逢應訝前
度人到玉洞花冥瓊臺月轉可許翫帷雙笑樊川漸老似風絮
沾泥綺懷除早分我胡麻殘年圖飯飽趙儀姑太夫人菜前調
詞云石梁遙亘天台路斯游最饒清妙手杖青藤腰鑱白木夢
裏當時曾到仙山春早看紅遍天桃閒情多少倚石迷花千巖
萬壑徑幽繞新詞繼蹤石室畫師憑寫出峰迴雲峭詩詠曹唐
賦裁孫綽輸卻風流懷抱元花著草想滿貯奚囊儘搜吟料遠

映霞標翠屏橫夕照餘詩詞尚多不能全錄

又吾里東藏寺代有詩僧余所見者如竺峰達曾柳橋悟詮墨緣證淳皆其選也竺峰兼善畫梅柳橋兼工書墨緣善畫山水竺峰嘗留余飲於曼陀羅室温稼生虞部文禾時為明經聞余在寺亦過從談飲甚洽余題詩寺壁贈竺上人云蒼荀香中一叩關待將法雨洗塵顏詩多綺語難呈佛寺有名僧即勝山參破畫禪花欲笑圓成茶夢鶴同閒白蓮倘結東林社應許泉明其往還稼生和云滿地松陰客款關風前相見一開顏林花散作諸天雨墻竹圍成半面山但使神交如水淡儘饒詩趣入雲閒黃嬌許我開新箬準擬宵分伴月還竺峰和云新詩忽喜到禪關老樹通靈亦破顏入社泉明多慧業分燈惠遠媿名山雨

餘石徑蒼苔合風靜松聲午夢閒儘有紗籠題壁句扁舟可許往頻還墨緣和云靦然一笑啟禪關雲水相逢洗俗顏願乞瀟湘江上句借題水墨座中山畫禪漫結千秋想詞伯能消半日閒小住未妨歸路晚滿舡明月載詩還

王獻鐵瓢道人遺事南林女史徐苴題鐵瓢道人按即烏程周七橋農之別署

小像云奇哉男子落落出塵一瓢一筵坐卧隨身詩瘦于鶴梅淡如人冰雪為胸風月作隣斷炊絕粒樂道忘貧古之介士今之逸民閨閣中筆墨絕無脂粉氣不可多得

南溟詩錄家治夫兄曰公案謂紀端嗜古績學於詩易中自謂時有

心得幼承庭訓即工韻語家貧艱於膏火日勤課誦夜分常熄燈默坐構思忘寐間或託之吟詠以攄懷抱詩書外別無嗜好

曾閱餘素公詩有句云兒子閒吟樓上頭阿翁廊下讀春秋足見淵源有自矣著有菊存詩草其風韻亦不減餘素集云

曉寒樓雜憶沈丈寅楣諱樹楷歸安歲貢輯里人山甫先生執友也與先生同館方丈濬朱氏以書名亦善畫然每自韜晦人無知者及後先生去朱氏丈爲寫方丈錄別圖筆意瀟灑先生見之駭然蓋雖同處數年亦不知其臨池之外兼善丹青也與愈愚先生爲婚姻故亦時與唱和今未知其稿尙有存否丁酉秋試與予同寓杭城予著西湖雜詠其第一首云五年夢不到西湖湖上風光似舊無欲上高峯愁足弱寒泉秋菊弔林逋丈見之笑曰殆非科名中人其識見遠到又如此

又山甫先生以詩學倡後進一時聞風興起者於予友得一人

曰夏君曼仙諱蔭棠字念慈又號省齋心谷先生後裔也自幼卽學爲詩及予寓其家

壬午以後予仍館溇北道寧草堂王氏王氏不能下榻故予常寓曼仙家與曼

仙其時出山甫先生詩曼仙讀之稱善故每擬其聲調好作古

風時適大水曼仙爲賦水災行情詞慷慨居然作者使天假之年所造當不止此惜不久卽故年纔二十有四妻先曼仙卒無

子後輿蛤邱氏子爲子予編其詩爲劍花館詩集並哭以詩有一卷殘詩

了此生句蓋紀其實也方曼仙病時予親爲扶持曼仙病溼毒內陷二便不通是日因腹脹如廁卒不得解汗出淋漓急扶上牀首未安枕而氣已絕矣嗚呼此情此景如在目前蘸筆至此其何以堪

又陸君虛若諱丙字懷谷縣學生醇謹老成於同人中年最長

乙酉秋試子與同寓嘗因雇舟雨中同出武林北門及辛卯君已前卒感念舊游為賦一絕打街屐齒一聲聲曾共巖關冒雨行今日槐黃君不見悽涼重過武林城

又師泉

按卽紀慶會號

亦間為詩用意深遠非淺識所能窺予嘗見其

過豐草庵遺址詩冰雪殘冬萬木枯陽春纔到氣潛蘇那知薄暮荒江上獨聽林中叫鷓鴣深得風人之致惜不自收拾頗多散失卒後許丈海樵於其家亂帙中搜得輯成一卷曰師泉遺詩予選其卓然可傳者數十首入紀氏詩錄辛酉秋遭兵燹詩錄亦焜聞許丈處有原本今未知尚存否異日當往問之

又丁若木先生諱宸字邦佐歸安籍辛巳恩貢亦磊師也

甲申乙酉

磊從先生博學多聞自古今沿革以及鄉邦文獻莫不言之鑿

鑿惜故自韜晦不求人知人亦遂無知之者為人氣度從容內和外嚴家硯香先生人傳其使酒難近唯先生能優容之每秋試必與偕硯香先生亦心折先生不敢有所忤其足動人畏敬有如此後習形家言得青囊秘術磊嘗從先生定孫愈愚先生壽藏及愈愚先生葬先生已前卒唯磊親臨其穴因感賦一絕為卜牛眠曲水隈春風三月喜追陪司空壽藏松楸長此日傷心我獨來先生有三子長某次詩歸安學生有足疾先生卒二子亦相繼亡今唯有二孫存焉

又殷君石溪諱鏘字鳴球嘉慶癸酉副貢人亦傳其有拒隣女

事性嗜酒唯不耐攻苦作經生伎倆耳故張君淵甫嘗有詩贈之曰石溪性不羈頗亦負俗累所以與之游謂其無他意美色

能不淫遇酒便取醉益以古人書殊勝悠悠輩

又家五樓兄諱大夏原諱文鳳字韓之秋瀾先生長子湖府增生精研經義汪文端公試湖州我族之取經解者凡五人兄其一焉一時有紀經解之目自後屢受知於學使者年六十七卒子三子嘗爲賦感舊詩鄭箋孔義說紛繁風雨繩牀記其論今日一編還好有空齋重到欲銷魂

又家蓄園先生諱雲倬字象賢縣學生磊族兄也淳厚方古磊見時年已七十餘猶手不釋卷亦間爲詩不存稿蔚巖先生尙齒會中曾錄其數首今已無存矣嘗作八十自壽詩有新詩惠我好題棺句一時和者甚眾亦足以見其胸懷之曠達云卒年八十四子一長沂春縣學生先先生卒著有心雲詩草一卷

又董若雨先生易發予未之見卽朱氏經義考所載觀之亦洞璣之流也家餘素先生嘗從先生受易集中有喜得易圖慨然擬古之作因錄於後於以見先生於易亦精研有得也易旨出在坎久陷天下人點畫幸不沒五嶽列嶙峋亦如江與河滔滔自不湮秦火不爲灰漢儒吹溼薪焦京尙占驗一毛廢全身清言推晉代王韓掃象塵正義奉英辟襲古唐諸臣殘圖安樂窩加一倍莫倫閉門程先生逍遙詣江岷失位表律呂斯義千載湮綜括理數間紫陽世共珍此時河與洛荒涼在荆榛清清鷗鵠溪源自河洛濱十年癡兀兀疑病感鬼神豁然自天開微言得露眞不離舊點畫嶄然頭角新自茲及未來讀易意已伸古人去已久恨未究其因多少章句人皓首徒逡巡智者竭其智

愚者始知津記得袖圖歸六月風雨晨

又孫愈愚先生酷嗜書籍嘗積至數千百卷庚申之秋悉遭兵火並其所刊詩文集板亦媿焉予嘗有詩弔之不積黃金祇積書當年心計未全疎豈知轉眼成灰燼書比黃金更不如

又家小山南金冶夫先生第三子亦能書嘗爲予寫忠敬堂額伸紙直書不煩繩削而停勻工整結構自然洵未易得也惜不永年予曾爲賦感舊詩石墜雲奔筆勢道空憐小阮最風流竹林杯酒情如許忍向燈前說舊游

又家味琴南枝冶夫先生次子少承庭訓亦習形家言善琴及奕兼工吟詠居家孝友冶夫先生有孝行爲請於朝得旌如例弟死以次子嗣弟後奉母以養喜交遊一時往還皆知名士著

溇溪水道考汪君謝城采入鎮志晚愛梅花又自號梅仙植益梅數十於半軒前翦裁合度灌溉以時每值玉雪初霏枝頭紅破暗香襲人入其室者如入蓬壺瑤島幾不知有人間世也及庚申之秋避跡溇西友朋零落生計日微遂鬱鬱以終年五十口時值亂離無與爲弔唯予曾一臨之其後半軒梅花盡爲他人攜去舊時歡笑之處亦變爲瓦礫場矣人生至此其何以堪予有詩哭之爲錄於後最難忘是舊家居庭有梅花室有書羈魄飄零悲此日豪談慷慨憶當初碧梧窗外鴻儒集阜角欄邊弔客虛今昔幾時光景異憑棺爲爾一愁吁

又陳君筱塘諱方毅字縈如烏程學生其先菱湖人至君始遷南溇以授徒爲生好獎掖後進有董生者貧不能具脩脯君不

受其贄教誨有加卒以有成爲人亦盡力君娶張氏與星槎爲僚婿其舅死無後料理其喪葬族有貧不能葬者代爲安窆君先世有兩代未葬邀予定其穴用意尤極周匝性嗜酒家庭雍穆子弟亦恂恂每誦讀餘閒引觴獨酌陶然自得也歲庚申粵匪犯南潯君已避村舍八月十六日偶攜孫返舊居翌日匪猝至孫被擄君痛從之匪屢叱回不從後遂不知所終其孫至明年始潛歸予有詩哭之聞道全家避遠村如何罹禍忽鄉園此中住住應隨鬼大半逡巡卻爲孫潯水悠悠新道路吳門隱隱古城垣不知何處堪憑弔風雨秋來欲斷魂

又家半山汝霖字獻琛五樓兄次子烏程學生少承庭訓精研經義於漢儒說經異同並能援引詳明故每爲學使者所拔取居家孝友父母卒喪葬盡禮一人經營不累兄弟親族有貧不能葬者恒叩募大戶捐貲葬之庚申之秋避地桃花莊明年八月於長漾遇匪被擄至蘇城備嘗艱苦壬戌春始潛歸就館上海張氏未□月病死吁惜哉年四十□子二長鼎壽烏程學生次德壽幼許丈海樵孫女適半山子其卒也有詩哭之云跳身虎穴得全身慶共周親額手頻無屋可歸仍客舍有家爲累作勞薪遲遲午夜牕前月渺渺申江夢裏人顏貌不殊驚隔世遙天揮淚重悲辛予亦有一首挽之纔傷寇擄復傷亡一念平生欲斷腸愁鎖胥江深夜月魂銷申浦隔年霜箕裘七世雖能紹自高高祖个臣公至半山七世書香不斷今鼎壽已八泮廬舍三椽已就荒回首九原應抱恨更堪妻子尙他鄉

又家角齋夢麟濱篁兄子濱篁兄年六十四始舉角齋及濱篁
 兄卒角齋已生二子矣角齋翩翩儒雅幼承庭訓及長從許丈
 海樵游阨於小試年二十□始補博士弟子庚申秋避地潯西
 素有肝疾一日中暑疑為舊疾復發誤飲糖湯少許遽卒時妻
 已前故唯二幼子無以為計賴妻舅金氏兄弟代為經營始克
 具棺殮云許丈有詩哭之附錄於後敢誇立雪有游楊少小相
 從廿載強黽勉一衿承世業恓惶半菽奈兵荒居憐蝸舍重遭
 阨泣共牛衣痛已亡兒女未成家又破如何撒手便相忘右其
 枯樹楊懷淚點紅誰憐庾信泣途窮關情聞說來相慰翹首甯
 知望已空三宿雞窗同聽雨春間會宿君家連宵噩夢忽驚風哭君悲
 其亡兒切腸斷何人識此衷右其予亦有詩一首一衿纔獲振

家聲何遽顛連隕此生青鏡愁分荀奉倩黃巾慮逼鄭康成最
 憐異地魂猶滯誰恤諸雛淚暗傾況我別來曾幾日小園記賭

石棊枰

又許丈海樵諱旦復午村人贅南潯沈氏後遂遷南潯自幼生
 長田間於農事尤悉著農事幼聞一書汪君謝城采入南潯鎮
 志庚申秋避跡長村後還午村舊居喜鈔錄友朋著作辛酉秋
 子寓焜於火舊著風雨樓集已灰燼聞丈處有選本癸亥春自
 北麻貽書於丈求之丈為寄余及余錄副本貽書復丈而丈已
 卒矣嗚呼傷哉年八十□予有詩哭之作書未寄遽云亡手把
 魚箋淚萬行亂後交情君最密生前和語我尤詳百篇慷慨新
 詩在三載流離故宅荒況是西河先抱痛首邱雖遂恨茫茫

又甲子四月寓同里曉寒樓憶少年交遊時事撰雜憶一卷至五月初五日至許丈海樵檢舊歲丈所答書正端午前一日前後適一年矣不覺涕零為淒然者久之因錄舊和晚翠樓詩以誌一時聚散之感而雜憶之作即止於此以後不復措一辭矣自我識丈來於今三十年意氣在疇昔謂足千秋傳師友資攻錯鳴鶴感詩篇竹林盛宴會列坐開廣筵于時惟興公愈愚首先生以道自肩作文最豪宕語不竭流泉其次我家駒半度先生編性命辨朱陸議論得真詮亦有金夫子山甫先生嘗策駑駘鞭賦詩孰與敵鸞鶴同蹠躔又次為兩沈卜宅東西偏東沈鄺元徒敦子萬派窮淪漣西沈三長擅小試纂羣賢柳橋眉庵亦英銳讀史能無前最少有丁董子香赴試恒同船春流溯苔雪抵足忘宵

眠惟此數君子腹貯皆便便德星偶一聚門外黃塵捐惟時我與丈亦或參後先敢希驥尾附聊用相周旋方謂友朋樂結習醫難痊未知何年月得斷此纏綿豈意不數載搖落隨風煙向時知己感無復憐夔虵人生固有死氣化隨推遷如何未下壽各已返箕躔翻疑世多妄自古無彭殤今讀長者詩令我感逝川日月不暫停白髮漸盈顛秋風來天未空堂為颯然斯人復何處搔首問穹天

冷廬雜識上海趙儀姑女史綦歸安汪參軍延澤之配也天性高朗有丈夫風骨博習經史兼工吟詠著有瀟月軒詩集句如殘紅盡落曉鶯老眾綠新生好雨多五夜懷親空有夢十年遣日只憑詩春晚云纔脫春衫換夾紗東皇何事便思家杜鵑聲

裏斜陽暮深閉幽窗避落花俱娟妙

遜齋隨筆汪母趙儀姑太夫人蔡子友謝城孝廉曰楨母博通經史詩詞古文俱佳詩如固山渡小關云澗水響潺湲征車曉度關天風來樹杪人語隔溪灣旅燕飛猶緩沙鷗夢自閒長安何處是回首只青山對月同夫子作云重將心事託霜蟾隔歲詩題欲再拈一片寒光澄碧宇十分涼意透疏簾清吟每向愁中得別恨都從醉後添幸有閒情同唱和定知不爲素娥嫌讀淮陰侯傳云獵獵英風大將臺當年一飯劇堪哀淮陰不少豪華客誰及蛾眉解愛才俱臻妙境餘如烟籠孤閣迴風度一蟬吟關河風勁征鴻急沙磧雲寒旅雁回遠寺鐘聲清別夢夕陽人影在孤亭溼雲破曉開延嶂嫩日烘晴上小牕都有畫意所

著瀘月軒稿已梓行

欖菑山房漫記烏程計明經成字永思其先自吳江之盛澤遷於南潯遂自號南林居士爲甫草先生東從弟余曾見其詩數首五言有空庭唯落葉客到尙尋秋之句大有深致卜亭先生士枚爲南林居士哲嗣丰儀偉然少著文譽常與厲樊榭施竹田張鐵珊舒雲亭諸君交游數上春官不第嗣以大挑赴選京師適丁外艱倥傯奔喪南歸亦不復出

又魚計先生

計發

克承家學銳志讀書尤刻苦作詩嘗館於同里

劉氏之畫扇樓以古學誨其弟子性和易愛獎掖後進時潯上詩道日衰而里中人士復爲興起皆先生提倡之益也晚年賦祭詩詩如補塞憂愁全賴此斷除煙火便如何書評兩字先須

瘦畫品千家只忌豪閒籠萬態毫尖盡滿領秋情髣髴腳攢皆道其詩境之辛苦也歿後并其先人篇什俱零落無傳矣

又冷餘

吳謙號

與同里邢書城交稱莫逆書城有哭吳冷餘詩八

絕句其第二首云八月雙圓恰半秋酒酣稽五狎清流水濱更有何人間無限蘆花盡白頭自注丙辰中秋與冷餘泛月於稽五漾此亦可見兩君興趣矣冷餘哲嗣霽歸安諸生汝雯乙酉拔貢後起振振淵源有自也

又柳南

陸吟號

性和易善交友晚歲以其子姪及諸孫皆能讀書

才名鵲起遂得逍遙物外於是渚花汀草牧笛漁榔觸處皆成詩境客至則煮茗推敲不談世事余嘗誦柳南詩鈔一無愁苦之音宜其頤養耆年領畧村居之樂也句如一徑入寒綠空庭

生夕陰樓高秋水遠木落夕陽多青山無恙在白髮幾人存平

燕兩岸煙初合黃鳥一聲春欲歸野鳧浴水多成隊老樹臨灘

半露根一徑西風催落葉半塘秋水殿黃花均不愧君家放翁

風格

又雪篷

楊鳳擊號

爲秋室弟工詩善畫嘗記乾隆辛亥上巳嚴鐵橋

招同修禊於余之鷗波小閣皆賦詩雪篷擅場旣而忽抱病不起鐵橋爲作哀鳳操其序曰哀鳳操爲友人楊鳳擊作也鳳擊才而天嚴子哀之援琴而歌曰鳳之飛兮翮其儀兮番然上擊惜不知所歸兮窅窅冥冥曷之棲兮已矣而不可追兮秋室文錄亡弟薨香廬詩序云往余應省選旅杭之西籟僧房錫朋將之甄胄來湖上別余留十日而發案薨香廬集寄兄秋室詩有

叢雁墮寒汀髡柳搖沙渚昔年別君江漲橋景況迷離有如此句見西湖秋柳詞注

董蠡舟鼃巢詩鈔引吳巖題畫詩後案語載太僕詩話云學使善飲工繪自題山水詩多清絕余送使黔詩賈董文章開瘴癘荆關圖畫富雲煙公爲擊節今詩旣散失畫之流傳亦絕少道光己亥之春得先生畫一幅并自題二絕句一時獲二不禁狂喜跋而藏之錄其詩於此補鎮志藝文之缺

董氏詩萃董金城亢之燠第四子少力學異思壯采驚其長老已削華就實酷嗜李安溪何義門諸先生書文益清淳有根柢爲父執業景鴻沈穎谷姚玉裁沈冠雲所許可暇則掌錄文選及王韋韓柳東坡遺山本朝王新城朱秀水之作求味兼采著

有少客詩集後以郡廩生爲湖郡拔貢第一亨途捷足方馳遽蹶不竟其志年三十五卒督學東昌鄧公亟賞其玉潔珠光悉歸典則策論識力斷制確有見解其卒也內外宗悲感不置云
遜齋隨筆范白舫先生先大父詩友也久客漢陽著書高尺許所刊幽華詩畧續漢上題襟集皆搜羅平昔交游零牋斷紙及投贈倡和之什先生詩崇樸素不尙華藻著有茗溪漁隱詩詞稿予爲作序茲錄其登六和塔云孤塔峙江皋登臨發興豪情開越山翠秋冷海門濤四望白雲落青天一雁高迎風鈴鐸響如聽奏仙璫昭君詞云穹廬毳帳月如霜一曲琵琶泪萬行回憶漢宮歌舞罷畫圖猶得近君王句如古寺云怪禽嘯似鬼荒草長於人感懷云窮途易灑英雄泪佳日空消著述心俱佳先

生又著漢口叢談凡漢口源流支派歷朝沿革以及坊市街衢
琳宮梵剎名流著述故老傳聞下至里巷歌謠青樓韻事靡不
采錄實足補史乘之缺已

又董鑄范先生學精三禮說經經經其攷據羣言腹笥亦富詩
筆清雅不以獺祭見長嘗以鼃巢詩集示予錄其依人雀云鳳
凰自言飢鶡旦長號寒竹花不實桐摧殘得過且過嗚辛酸咄
哉野青雀毛豐羽戢戢啄粒平田足自給蓬蒿枋榆皆可集何
爲意態柔且馴翩翩簷下來依人主人富家子一俗淪骨髓慣
將腐鼠嚇鷓鴣籬斷竹彈慈烏燕巢毀卻鶴煮死那有黃花來飼
爾渡黃浦暮抵上海云盡納西南水滔滔赴海門長流環郭遠
巨浪挾沙渾櫛比帆檣密雲屯井邑繁巖城維纜處燈火已黃

昏感懷云壯懷忽過請纓年那有封侯面似田一刺已看漫袖
裏八駟豈羨列車前蛟龍失水猶常畜鷄犬升天亦列仙差喜
病餘狂漸減此心泥絮等枯禪老妓云舞衫零落冷香篝欲畫
蛾眉攬鏡羞顧我身如秋日扇妒他春在別家樓英雄末路誰
青眼名士文場易白頭一樣窮途淪落感琵琶未聽泪先流句
如虛庭先受月獨夜預驚秋閒愁貧醞釀佳日病消磨薄烟平
冼樹斜照側穿雲萬事破除憑酒力一貧消滅到詩才花影上
簾和月捲竹梢敲戶倩風開畧有才華應命薄非無骨肉只心
孤貧甚轉無人索負慵多惟恐客過存俱葶甲新意自出靈杼
者先生又有潯溪權歌百首名流勝跡逸事遺聞靡不廣爲搜
羅登諸謠詠可與小長蘆鴛鴦湖權歌並傳

又鑄范夫人吳氏端莊流麗有林下風早卒先生哭之哀有絮影盦詩一卷俱傷逝之作其爲人題憶紅圖云人間天上去何之又是香山舞罷時我與流鶯同一哭五更風雨葬西施祇覺風光到眼非惱人最是柳依依闌干倚遍渾無緒斜日空庭絮亂飛平居猶復繫相思解到金鈴總泪垂況是神傷荀奉倩悼亡偏值落花時又自題花坪長憶圖云苔徑依稀履跡存綠蘿深掩幾朝昏孤懷怕識春風面每值花時便閉門依舊芳菲錦作圍花坪風景未全非落紅慣把春衫污那識桓郎愛故衣惜花能不泪潸潸憔悴荀郎鬢欲斑撒手輪君歸去早相逢畫裏尙紅顏酸心語不忍卒讀

又鑄范先生古詩疏疏落落多蒼莽之氣間亦有爲昌谷體者如秋雨曲云蕉心破綠桐流翠倒挽銀河齊滲地石破天驚逗恨多浹旬尙灑雙星泪淒動紅樓透翠櫳隔花秋點雜銅龍背燈枕手屏山外一翦離離瘦玉蟲碧荷聲靜涼珠定徹曉新霜換明鏡西風吹滿茂陵愁長門金盡相如病

又同里溫鐵華先生曰鑑精地輿攷據之學著有魏書地形志校異歷朝郡縣名編韻嘗讀書於妻父劉疏雨州司馬桐眠琴山館中劉氏多藏書插架至十餘萬卷凡宋槧及精寫本不惜兼金羅致先生因得流覽學日益進詩文俱妙所刻僅拾香草堂集二卷古壁叢鈔一卷蓋沙汰者多也茲錄其謝文節公琴歌爲吳素江賦云謝公琴出廣陽域都市沈淪人不識吳君操纓負奇癖不惜兼金重購得攜歸裴几光書帷正氣凜冽生屢

絲公也忠義在青史試譜琴歌一奏之初調宮絃聲已苦木波
北向蹈且舞金臺回首望南雲蘭亭落日冬青樹三閩四廣餘
燼收漲海厓山沈御舟移商忽入指南錄疾風柴市場沙秋羽
聲忼慨復變徵劍槊相摩還集矢江東殘破饒信亡微服出奔
以母耳再三卻聘書屢揮字字悲咽暮采薇黃冠孰誣信國請
公不餓死將安歸劃然七絃似槁木更審五音似亡角是時故
老子無遺誰爲水雲續琴曲一激一昂歌且哀靜夜恍見忠魂
來天風海濤寫不止似聞兵甲聲喧豨主人抱琴心逾練日三
薰沐梅花片知音補錄交信編挈侶當伴橋亭硯臨安故土移
六更譜成歷敘公平生一彈白塔子規叫再鼓六陵霹靂驚又
讀秦始皇本紀云海中蓬島原無路世上桃源別有仙白桃花

云夾岸春波明似畫一溪涼月澹無痕俱爲楊秋室先生鳳苞
所賞

又感豐辛亥予客揚州倩雲間黃秋士鞠繪眉月樓填詞圖諸
名士不吝珠玉題贈甚多最佳者如儀徵阮梅叔先生亭詩云
綠窗風定捲疏簾涼月填詞韻自拈好與畫眉人並坐一彎新
月露微尖摘粉搓酥最擅場風流原不讓堯章小紅色藝人間
有只少知音似順陽江甯何梅屋詠詩云金荃樂府付吳謳吹
徹瓊簫嬾下樓冷對畫中姜白石碧天眉黛一痕秋棊几湘簾
坐夜分一枝詞筆酒微醺風流比似陳湖海捧硯還應乞紫雲
吳江是我舊停橈愛煞彎環水一條他日與君同唱月櫻桃湖
上畫眉橋仁和張穎仲維嘉詩云紅豆青衫託豔思鵝笙象管

南齊志 卷六十一
寄新詞十三人與初三月併入屯田筆一枝楊柳風前咳唾新
畫欄一角倚吟身遠山亦是文君黛贏得相如賣賦貧入洛機
雲未易才吳中團扇話南來還應五鳳修成後眉史教君一例
裁許石聲離判大猷詩云新月彎彎未上弦遠山眉黛似爭妍
知君自有姮娥伴不羨吹簫白石仙想見含毫點拍時幾回斟
酌費凝思烏絲闌紙紅絲硯寫出花間絕妙詞盧朗甫晉裴詩
云花管爭推左與言惟雲翦水兩無痕一彎新露娟娟影消受
琴餘寶鴨溫如此才堪五鳳修偶將漁笛譜蒼洲吳興占得佳
山水都付詞人筆底收依然明月是前生簾捲西風細品評自
拍紅牙教小玉肯將斟唱換浮名吳江仲子湘先生湘月下笛
詞云蟾彩微茫鷗波宛轉替描樓影若溪咫尺不少詞仙舊樓

隱梅邊幾度嬋娟照儘一笛春風未冷又初三四夜比肩東美
坐賡嬌韻閒領瓊香靜笑酒醒屯田只吟殘景新妝正靚小紅
雙翠遙映揚州便占三分二奈客裏闌干獨凭且按譜唱家山
一闋常娥忍聽陳小松司馬彬華湘月詞云玉壺皎潔只瓊樓
悄倚勾起清興恰好初三早畫出一片彎彎風景揉碎紅心凋
殘青髻付與吟魂冷茗溪清絕夜涼別具幽境應是魯望風流
江湖嘯傲蕩烟波春影寸樣愁腸儘領畧月落天空人靜刻翠
偏工流黃自掩酒奈今宵醒簫聲吹度夢回卻待重省平湖家
秋山先生增湘春夜月詞云倚雕闌一彎纖月當頭幾見鏡影
空圓鉤不住離愁好似柳眉初展歎落花狼藉獨上迷樓較舊
時月色情天碧洗香夢溫柔新詞譜就紅情綠意重憶鸞儔露

涇東風名草春去後女蘿絲裊還繞扶留檀痕細拍付翠鬟先試
 嬌喉選勝處紀遊行閱徧橋連廿四鴻雪揚州朱聞溪昌祺鳳
 凰臺上憶吹簫詞云纖影當樓一鈎如黛幽情都付詞人更堪
 小紅低唱茶熟香温京兆當年韻事停按拍細與評論近時樣
 淺深淡遠點染宜勻緬懷機雲入洛道此才真箇橫掃千軍把
 曲曲朱欄倚遍形影俱清漫說銅琶激越算何似殘月耆卿捲
 簾處遠山如殺眉痕

又寇亂時潯南小廟中有題壁詩云閩外何人擁節旄十年征
 戰也徒勞金杯飲盡千家血銀燭燒殘萬姓膏人淚落時天淚
 落寇至必雨喊聲高處哭聲高羣黎盡付豺狼喙孤負君恩是爾曹
 不知何人所作

李氏宗譜時羣公

按時羣為李廷廣字

道經屯溪題詩旅壁越一載友人

自江右歸遞一緘啟視乃逆旅主人和作也詩有云投宿何曾

無俗士能詩自應是高人心懷故土情常切話到家鄉語更真

主人許姓生長於潯故云翰墨因緣千里一室主人殆風雅士而市隱者歟

南潯志卷六十終

跋

浙西市鎮南潯爲大其民習勤動善治生用能於兵燹板蕩之餘轉衰耗爲盈阜其人文蔚起炳然與劇邑相埒咸豐季年宿儒汪謝城先生撰南潯鎮志四十卷采摭官私圖籍至二千五百餘種可謂宏富矣迄今歲星六周文獻留遺慮其久而散佚周夢坡廣文創議賡續曾辱誣諉廉以謏陋辭周君偕里中同志殫力搜討越兩年而成書六十卷舊志疆域限斷較狹新志展拓兼及輯里各村爰不以鎮名而曰南潯志子目視舊畧有增并取材多而體例嚴端緒蹟而文詞簡與舊志相得益彰堪備史乘采擷不獨閭里增華也寫刊將竣周君屬廉校讎一過僭爲糾正脫誤若干處私幸於潯溪輿地掌故得聞其詳因念

吾秀邑志與涇鎮志屢議重修限於物力迄未告成不禁重有感焉若溥事之特異於他處者有莊氏史案彼時嚴刑峻法為世詬病庚子以後國威既挫論者乃援九世復仇之說舉史案為修怨之一端由是知得位乘時者當釋罪疑惟輕之訓慎勿與匹夫為讎貽禍將來而斯志之詳載史案洵可為萬世鑒戒者也特鄙意尚有未解者君權全盛容有文字之獄奈何號稱擴張民權言論自由之世亦屢思關人口而肆其威則又何耶且溥之史案謂有種族之嫌則構成之吳令與夫依違其間之巡撫學使皆漢人也其時君主勿冲怨毒之叢似宜有所區別矣廉因是而又慨夫前明洪武之草菅臣民蘇州知府金綱請減重賦誅死金陵民間為燈謎疑其誚馬后滅門者數家廉十八世從叔祖貴誠公與萬三秀沈富有戚誼捕至南京罰築三山街仍斃之獄成

其後人於遼東由家長歲輸千畝之租給戍遼之子孫至天啟失遼始免學官某奏疏用殊字即置極刑此類未見史傳永樂之殄滅忠良外方孝孺宗親死者八百四十七人九族外親之族死徙者六十五人母妻二黨謫死者三百八十八人練子甯宗族誅夷姻戚論死者一百五十一人遠戍者數百人胡閏族死者二百七十七人親族之外親師友交遊死徙者數千人胡閏妻汪氏茅大芳妻張氏死於獄皆命以飼狗毀孝孺及高翔先墓焚骨揚灰更或將忠臣妻女發教坊為官妓天啟之昏庸殘賊者瓜蔓搜抄村里為墟延及鄰邑何異豺狼天啟之昏庸殘賊及拷死詔獄籍世知之矣廉九世族祖元暉中丞以熊襄愍事波已數世者亦不免此下迄崇禎救亡之不暇而亦果於刑戮綜計有明一代慘酷浮於秦漢奇冤碧血罄竹難書顧世罕有痛斥之者豈以同種故而恕之乎廉所以大惑不解反覆溥鎮史案振觸於懷遂附論及此即以為跋尾癸亥孟冬秀水陶葆廉病後力疾書

